



~~17~~
~~31~~

8-17-C 25





8-47-C-25

Adumbrata Imago
SOLIDARVM VIRTVTVM
ROBERTI CARDINIS BELLARMINI
POLITIANI E SOCIETATE IESV
A Marcello Cernino. Eius Nepote
exposita
GREGORIO XV. PONT. OPT. MAX.



S E N I S,
APVD AEMILIUM BONETTVM. M.DC.XXII.
SVPERIORVM PERMISSV.





SANCTISSIMO

AC BEATISSIMO PATRI



RES illos gentilitios radios, si tibi, Beatissime Pater, dicam datos, quia ex tua altissima, & Cœlesti Sede singulas uniuersi partes tribus diuinis virtutibus aspergis, & ex obscuris ac imis tenebris ad clarissimam erigis lucem; me ne quidem unguem à veritatis linea aberrare dicet nemo. Enimuerò Christianæ Reipubli-

ce parens vigilantissimus, & communis Religionis cupidissimus propaganda, Purpuratorum Patrum designasti Senatum, quo ad gentes, quantumvis abditas & barbaras, Sanctissima nostra Fidei aperiatur aditus. Ad sperandam etiam hereditatem illam, quæ nobis per spiritum adoptionis DEI filiis promittitur in cælis, omnes confirmas, nec non quinque piissimorum intercessorum, quos inter Cælites adscripsisti precibus, dignaris roborare. Supremus tandem Pastor oues tibi commissas amplecteris dulcissimè, saluberrimis alimonijs & disciplinis ad veram innutris charitatem, & ad eter--

num regnum amātissimè dirigit.
Quarè hoc meum quicquid est
de Roberti Cardinalis Bellar-
mini moribus, tuo insigniri no-
mine optare non dubitavi. Pa-
ternos enim tuos spiritus in dul-
cissimo filio recognosces; ex isto
tuae maiestatis splendore lucem
tenebricoso operi meo gloriamque
effusè cōcedes, & piissima illius
acta per omnes nationes circum-
feres. Verum hos ego mihi ani-
mos assumpsi, qui ipsius Roberti
Nepos primo tui Pontificatus
initio in benignitatis tuae, & pa-
trocinij gremio ab eodem fui com-
mendatus. Quiquè Patrum
magnum habui Marcellum Se-
cundum, qui dum viueret ab

Excellentissima LVDOVISIORVM
 Familia, summo honore, & ma-
 xima benignitatis incremento est
 habitus. Grati igitur animi mo-
 numentū immortalitati tue, qua-
 quē scripsi sacrata velis, dum
 ipse post pedum beatorum oscula
 DEVM Optimum Maximum
 precor, ut ad multos annos San-
 ctitatem Tuam incolumem
 seruet.

S. T.

Addictissimus Servus
 Marcellus Cerninus.



*Robertus H. S. Praeedit ... Card. Bellarmini.
Politianus 7. Martij 1599.*




De Lacrymis, quas fundebat
CARDINALIS BELLARMINVS
dum purpura induebatur.

EPICRAMMA
FRANCISCI BONINSIGNEI
ACAD. PHILOMATHI.

D*V* M rutilant sparsi Romano murice crines,
Castaq; purpurea cyclade membra tegit:
Heu flammis circumdor, ait; quin pellite: & vndā
Extincturam ignes lumina dia fluunt.
Quam benè nunc flammās lacrymis extinguit
amaris,
Flammās, quas genuit purpura nata mari!





RELATIO
DE VITA, ET MORIBVS

*Roberti Cardinalis Bellarmini
Politiani,*

E SOCIETATE IESV.



MENSA, & incom-
prehensibilis sapientia
DEI, quæ habitat in
consilio, eruditq; in-
terest cogitationibus,
cuius est æquitas pru-
dentia, & fortitudo,
per quam Reges re-
gnant, Principes imperant, & legum con-
ditores iusta decernunt, sic Sacrosanctam
Matrem nostram Ecclesiam, quam pretio-
so vnigeniti Filij sui Domini Nostri IESV
CHRISTI sanguine dotauit, ac multiplici
Spiritus Sancti ornauit gratia tuetur, ac
regit, vt pro temporum necessitate ido-

neos viros ei assignet, quibus dum per va-
 rias huius sæculi procellas, ac fluctuantes
 tempestates agitur, de nequissimo hu-
 mani generis hoste triumphare possit.
 Apostolorum ita fide illam roboravit, Mar-
 tium cruciatibus, ac trophæis stabilivit,
 crescete, multiplicataq; hæreticorum pra-
 uitate, Doctorum cœlesti Doctrina illumi-
 nauit, & denique plurimorum circumfedit
 exemplis, quæ posteris norma rectè vitam
 instituendi existerent. In infestantibus il-
 lam Hæresiarchis in Valentinianos, vnum
 ipsimet, & eodem tempore dedit Iræneum,
 In Nonatianos Cyprianum, in Manichæos
 Titum Bostrenum, in Donatistas Opta-
 tum, In Arianos Athanasium, Gregorium
 Beticum, Hilarium Pictaviensem, Ambro-
 sium, In Eunomianos Basilium Magnum,
 Gregorium Nazianzenum, In Iovinianos,
 Vigilantios, ac Pelagianos, Hieronymum,
 Augustinum, Innocentium, in Nestoria-
 nos, & Eutichianos Cirillum Alexandri-
 num, Leonem Papam, & Ioannem Bessia-
 num, In Monotelitas Sophronium, Maxi-
 mum Martirem, In Niconomachos Da-
 mascenum, In Herricianos, & Petrobosia-
 nos Bernardum, In Hussitas Aeneam Syl-
 uium, Siluestrum Pieratem, In Luthera-
 nos Rossensem, Morum, Caietanum, So-
 rum, In Calvinistas verò, & cæteros no-

tri temporis plurimos, inter quos veluti
 inter clarissimas gemmas vt Pyropus re-
 splendens non religione minus quam Do-
 ctrina, illam acriter defendit & omnibus
 exemplum reliquit imitatione dignissi-
 mum ROBERTVS Bellarminus, cuius acta
 præclarissima cum nō nullos audierim cō-
 scribere, ingratum minimè fore duxi, si ea
 digniora in lucem referrem, tum quæ per
 decennium, quo à primæua adolescentiæ
 mea apud illum eo inuitante Romam vo-
 catus, ipsemet intueri, & à Testibus fide
 dignissimis audire potui, tum etiam quæ
 desumuntur ex Epistolis, & gentilitijs Chi-
 rographis, quæ pro triplici sanguinis vincu-
 lo, quo Robertus cum familia mea erat
 implicitus pœnes me asseruatur. Politiana
 igitur in Ciuitate non minus prospectu,
 & natura amabili, quàm nobili ædificio-
 rum descriptione ex antiquioribus, & pri-
 mæ nobilitatis familijs progenitus Patrem
 habuit Vincentium Bellarminum Opti-
 mum Virum, Matrem verò Cynthiam Cer-
 uinam primariam iuxta atquè integer-
 rimam Fœminam, ac sororem Cardinalis
 Tit: S. Crucis, qui postea ad Petri fasti-
 gium euectus Marcellus secundus nomi-
 natus est. Quare e filijs tertius in lucem
 editus anno Salutis MDCXXXII. die quarta
 Octobris, Robertus Puccius Sanctæ Ro-

manæ Ecclesiæ Cardinalis Nobilis Florentinus illum Sacro fonte suscepit, communicatoquè Roberti nomine nuncupauit. Nec pueritiæ fines excefferat Robertus, quin præclaræ indolis indicia dederit, & summam de se expectationem in omnibus excitarit. Cœlestes quippè delicias degustare incipiens, quod temporis in illa tenera ætate in ludis, in iocis, & puero-
rum delectationibus concedi solet. Hæc omnia contemnens puer Robertus totum sumebat in ijs, quæ ad salutem pertinent percipiendis, & naturæ vires superare contendens non rarò formatis sibi fictitijs Cathedris concionandi munus explere se aptabat. Iis initijs creuit accuratè educatus, nec minus ætate, quàm virtutibus subornatus adoleuit ille, qui omnes seclusit lubricas vias, quibus iuuentus insiltere, aut ingredi sine casu aliquo, aut prolapsione vix potest, qui omnia denegauit voluptatibus, cuius omnis voluntas, omnis cogitatio tota mens Religionem, ac sapiëntiam studuit quàm acerrimè contemplari. Erat quippè Roberto æqualium manus, necessitudo affinium, condiscipulorum abundantia, quibus familiaritate & consuetudine iungi oportebat. at ea moderatione ijs utebatur, vt nulla illorum blandimenta, nulli ludi, nulla conuiuia, nullæ voluptates

delectarent, & nihil sibi expetendum putaret, nisi quod cum Sanctitate, & sapientia esset coniunctum. Quapropter inanibus despectis curis, & in diuinis contemplandis arcanis intentus sepius conuersabatur in Cœlis. Sacrificio Missæ intererat quotidie. Beatæ Virgini psallebat. Sacra CHRISTI communionem singulis Dominicis diebus reficiebat se. Sodalitati S. Stephani, quæ internobiles illius Ciuitatis primum obtinet locum Festis singulis aderat & piè sermocinabatur. Quadragesimales, & qui in honorem Sanctissimi Domini Nostri Aduentus celebrari solent dies cum cœteris alijs ieiunijs sedula adamusim religione retinebat. Prætereundo Ecclesias singulas adire, & numen salutare volebat. Intra domesticos parietes Familiarium etiam vitabat colloquia, rarò ab ipsis videbatur, & sub ipsa adhuc Laica professione plenè iam Religiosi Viri specimen præseferbat. His tamen ità erat intentus, vt etiam de studijs nihil remitteret. Grammaticæ enim operam dedit, Rethoricæ incubuit, litteras grecas apprehendit, & sub disciplina Patrum Societatis I E S V in omnibus miros profectus fecit. Imò ad omnia versatili præditus ingenio, syderum interualla motus magnitudines ac nomina imbiberat. Vocum di-

stinctionem didicerat, Poetatum erat eruditus præceptis, & ea pollebat memoria, quod Marcellum Ceruinum tunc Cardinalem Auunculum, quo tempore Politiani commorabatur, sæcundus, & eius eruditissimus sermo maximè delectaret.

Erat Roberto Auunculus Alexander etiam Ceruinus eiusdem Marcelli germanus Frater, qui Hieronyma Bellarmina Roberti Amita in matrimonium ducta amorem reciproco & duplici Sanguinis vinculo copulatum cum Bellarmina Familia effecerat. Is Robertum vehementer amabat, suauitatem morum, virtutum ornamenta summa cum admiratione in illo intuebatur, ac summa de ipso expectatione concepta illum veluti in filium adscriptum ad studium Patauij cum Riccardo, & Herennio genitis destinarat. Et iam expectationi de se excitata Robertus respondere Imò præire paratus Patauium petere se comparabat. Sed ad maiora excitatus meliora sibi proposuit; caducitatem terrenarum rerum considerans, cœlestium verò stabilitatem contemplans, temporalia protinus abijcere, ad spiritualia & æterna insequenda sensim captus est. Societatem IESVS profiteri decernit. Nec tardè nouum Roberti consilium, ac deliberationē clara indicia Parentibus aperuerunt,

qui quanta molestia fuerint affecti, quanto oppressi dolore incredibile est. Recens enim adhuc erat, & in illorum animis tenacissimè hærebat angor extincti Marcelli Secundi, hoc est illorum extinctæ lucis: Nec Bellarminę domui erat, in quo magis acquiesceret, quam in Roberti expectatione. In illo enim solabatur; in illo tota eius reuiuiscendi spes posita erat. Vehementer igitur commoti nulla intentata via est, qua reuocare à proposito illum se posse confiderent. Sed neque maiorum preces, aut domesticorum Squallor ipsum inflectere potuerunt, quin in hoc quasi conflictu dies aliquot mirum in modum exagitatus firmior euaderet. Proponunt illi antiquissimam & nobilem Religionē, gloriæ, & honoris gradus in illa promittunt; ad pingua Sacerdotia, & Cardinalatus insignia facilem per eam ascensum ei futurum præmostrant; ad quæ seclusum aditum Societati Iesv esse commemorant. Sed hæc ipsamet, quorum causa ipsi pugnant, illum reddebant fortissimum, & inexpugnabilem, utpotè, qui res eas infra se positas aspernabatur & despiciebat.

Aderat tunc temporis Riccardus Ceruinus ex ipso Alexandro Marcelli Secundi Nepos, & Sobrinus Roberti, qui paternæ domus comoda fastidiens, & rerum per-

ræsus vicissitudines eidem Societati IESV
 nomen dare statuerat. Factum itaq; diui-
 no consilio est, vt qui affinitate terrena de-
 uincti essent ad eandem Societatem ordi-
 nemq; vocati cœlesti ac diuina coniunge-
 rentur. Noua igitur petierunt, priscisq;
 posthabitis maiorum honoribus in ordi-
 nem sacrę Sodalitatis IESV admissi sunt.
 XII. Cal. Octobris. MDLX. Roberto æta-
 tis decimo octauo. Hic cum singularis
 Iuuenis ad CHRISTI traductus partes in
 noua se acie consistere animaduertit. Mi-
 rum est quæ Religionis iecerit fundamēta,
 quæ virtutum tyrocinia dederit. Hic à pri-
 mo temporis ingressu ita pugnaciter ac
 strenuè tenuit locum, vt omnibus, & Pie-
 tatis, & Sapientiæ gloria antecellere vide-
 retur. Instituta igitur Societatis suæ pro-
 fessus, ac forma soliti Tyrocinij, tunc per
 quindecim dies seruata, Societatis candi-
 datus probatus fuit, & Alumnus Collegij
 Romani destinatus, vt Philosophiæ disci-
 plinam cognosceret: Vbi quantum se pro-
 derit in Roberto acumen Ingenij, est mira-
 bile; cum tanta celeritate proposita ap-
 prehenderet, vt nulla videretur ei data in-
 stitutio, sed ipsa propemodum indidisse,
 ac penitus inseruisse natura. Vix reliquis
 tantum dabatur temporis Magistrum ad-
 discentem insequi, & summa notabilia
 conscri-

conscribere, dum solus Robertus non solum percommode omnia, sed claro & eleganti Poetarum metro reponebat. Sed tam miram felicitatem ingenij commiscere infirma natura voluit. Dedit quippe Roberto morbos pergraues, & ex lethali, ac diuturna febris tanta imbecillitate corporis affecit, vt planè vsquè ad triginta suæ ætatis annos de salute laboraret, & obnoxium morbo tabido constitutus redderetur.

At hæc Roberti studiorum sollicitudinem, & seueriorem disciplinam vitæ minimè retardarunt. Triennio enim, quo rerum naturalium propositiones, & Dogmata solent explanari, absoluto, Magister artium creatus Florentiam missus est; vbi per annum Rethoricam edocuit & concionandi initium fecit. Deindè ad Montem Regalem apud Subalpinos destinatus in Rethoricæ facultate pertractanda, & in sacris concionibus prosequendis Triennium summa cum laude, & admiratione consumpsit. Vnum tamè præter naturam fuisse dici potest, Robertum non paulatim rerum diuinarum doctrinam, & sensim apprehendisse, sed penè confestim & è vestigio peruenisse ad summum; Magistrum ac Præceptorem non habuisse, sed institutorem Authoremquè consuluisse animum suum. Patauij

quippe vnius tantum anni periodo commemoratus ad audiendam Theologiam concionandi simul munus exercuit: Deinde Genuam profectus ornandæ congregationis prouincialis causa, biduo in summo templo Thæses Philosophicas, ac Theologicas defendit, tanta cum dignitate, & sapientia, vt sibi omnium mentes deuinxisse videretur. Louanium VRBS est populorum multitudine potentissima, florentissima opibus, scientiarum studio ac Vniuersitate nobilissima. Hic Robertus per septennium partim latinæ conciones habens, partim Diui Thomæ Theologiam publicè professus edocens, eloquentiam præ cæteris ostendit egregiam; Facundiam præmonstrauit Diuinam; magna cum animi vocisque contentione Religionem veram acclamauit; Summa cum alacritate vanas superstitiones esse abiiciendas, & Deos execrandos, Patrem Vniuersi, & CHRISTVM eius Filium iam inde vsquæ ab æternitate DEVM, & è DEO factum hominem esse colendum indixit. Interim sacris ordinibus Robertus initiatus est. Quare Leodij Subdiaconatu, Grandauij Diaconatu, & Presbiteratu suscepto, Louanij Sacerdotij Primitias Diuinæ Maiestati obtulit anno MDLXX. Ad nouam igitur prouectus dignitatem novos sibi comparauit

Spiritus, & religiosos innutrit affectus. Magna quippè reuerentia hanc potestatem sibi à D e o demandatam pertractauit. Quare quatuor etiam vota Sodalitatis Louanij professus est. At cum subito militum Hereticorum prouincia turbaretur incursu, videns salutem temporalem fugæ præsidio esse vendicandam, vna cum Socijs mutatis vestibus fugit Duricum. Vbi per quatuor menses commoratus redijt louanium. Sed cum in morbos grauissimos incidisset, quibus curandis cœli solum mutatio superesse videretur, accersitus fuit in Italiam.

R O M A E autem reuersus tuædæ ac propagandæ Religionis cupidissimus docuit per vndecim annos, scripsitque plurima, vt vel desertores Religionis reuocaret, vel Barbaros ad eandem perduceret. Opus quippè longè maximum & lucubrationes omnino difficillimas postulans aggressus: incredibili labore, ac felicitate perfecit. In expurgandis confutandisque Hereticorum erroribus & argumentis studiosissimè suam operam posuit; & admirabiles rationes inuenit, ac propugnacula, quibus vera pietas, vbi iam sata esset, redderetur incolumis, vbi vero insita non fuisset produceretur, & ab omni falsitatis suspitione redderetur illæsa. Et admirabile quidem

est quam citò lōgè lateque peruaferit eius doctrina, & ad Vniuersas penè nationes penetrarit. Nec pauci fuere, qui cum ex remotissimis Regionibus adirent Romam, eius hauriendę Doctrinę percupidi, gestirent lætitia & inusitato gaudio lacrimarētur, cum Bellarminum aspicerent, cuius nomen celebri fama tam procul acceperant. Interim Theologię Doctor effectus multos eiusdem insignibus decorauit. At eccè tibi grauissimo, ac formidoloso bello tota Gallia agitata Henricus Caietanus S. R. E. Card. Camerarius à Sixto Quinto Legatus declaratus, Parisios petijt. Nec voluit vigilātissimus Pontifex in tot Sapientissimis Viris huic legationi destinatis Bellarminum vnum præterire, cuius presentiam vniuersis fore approbatam, Caietano verò acceptissimam nouerat. Robertus igitur itineris periculis, & incommodis superatis permultis, & magnificam liberalitatem Henrici prospexit, ac postea celebrauit mirandam, & suam Henrico patefecit virtutem. Sed Pontifice vita functo cum legato redijt, & Romę à suis magnā lætitia exceptus, operibus inchoatis perficiendis se toto studio iam dederat. Dum Innocentius Nonus ne dum penè Pontifex acclamatus Bellarmino purpuram maturare decreuerat. Et iam Au-

gustino Cardinali Valerio Veronæ Episcopo, quem doctrina & vita simillimum, amore vero & consuetudine Roberto aspexerat coniunctissimum, Marcelli Secundi, quem singulari & fraterno penè fuerat semper amore complexus, iacentem extollere dignitatem propositum sibi habere aperuerat; Robertum vnum elegisse eius Nepotem, Auunculi pietatis ac sapientiæ veram Imaginem. Sed cum idem Pontifex non obscure significasset etiam Patri cuidam eiusdem Societatis Iesv, qui sui familiaris, & intimus erat, vnum e sua Sodalitate proximè Cardinalatus honore esse decorandum, Bellarmini tantum reseruatō nomine. Ille se Pontifici gratissimum cognoscens, ne sibi hoc immineret in suspicionē venit. Quarè sicuti Spiritum humilitatis & paupertatis cum Societate suā verè profitebatur, à dignitatibus abhorrens, vehementer commotus in lacrymas, precesque fusus, ne Sodalitatis suæ instituta illæsa ad id tempus conseruata in discrimen vocari sineret, Pontificem obtestari cepit; & se nunquam discessurum, nisi Sanctitatem suam ab huiusmodi mēte aliquo pacto deductam relinqueret, ea, quæ poterat reuerentia, affirmabat, & tam grauitè, ac dolenter querebatur vt Pontifex, qui D*e*i famulum tristem ac mœrentem

se dimittere non patiebatur, flexerit animum suum, & in proxima illa promotione neminem e Societate sua assumendum promiserit. Statuerat tamen Pontifex Bellarminum in secunda Patrum assumptione promouere, eidemq; Veronæ Cardinali hoc totum deprompserat. Sed secundo sui Pontificatus mēse penē elapso extinctus est. Robertus autem cui ipse Cardinalis hoc liquido exposuit, & Dēo gratias egit se efugisse talis dignitatis fastigium, & Patris qui ab huiusmodi se defenderat periculo collaudatam virtutem summopere dilexit. Interim Rector Collegij Romani, & postea Prouinciæ Neapolis Gubernator declaratus in hac etiam parte vigilantissimus admirabilem moderationem adhibuit, & in primis perpetuò Religionis plaulu fuit approbatus.

- Sed ad nouum Bellarmina Virtus vocata munus, nouum est laudis nata Theatrum. Consultor nempè S. Officij effectus, & Ferrariam cum sanctissimo Pontifice Clemēte Octauo adductus, Episcoporum examinitoris munere fungi cepit; Romam vero reuersus Pœnitentiarię Rector destinatus die tertia Martij M D X C I X. coactus est præcepto Summi Pontificis Cardinalatus insignia suscipere. Magna etenim constantia, ac virtute Robertus recusauerat, & omni-

bus rationibus se opposuerat, ac precibus, quò minus hanc dignitatē subire compelleretur. Sed hoc vehemētiùs studium Pontificis inflammavit, quod tantā cum summa virtute, ac eruditione modestiam in altissimo gradu, vt omnibus nota esset collocaret. Iussit igitur Pontifex prudentissimus purpuratorum Patrum numero adscribi Robertum, Cuius sapientiæ in Ecclesia DEI (his verbis vsus) non inuenerat parem, & qui Marcelli Ceruini Nepos tanti Pontificis hæreditarijs ornamentis propria, ac verè singularia addiderat. Viuebat enim adhuc & firmissimè inheribat in illius Sanctissimi Pontificis mente Marcelli Secundi felix recordatio, nec diuturnitate temporis pijsimi viri promerita abolita erant; retinebat intimam beneuolentiam, qua Marcellus Aldobrandinam familiam, ac præcipuè Siluestrum Pontificis parentem firmissimè intuebatur, & vt tantæ clementiæ ac magnitudinis animi par erat, quæ Marcellus in sublimi sede collocatus, Siluestro Urbis præfecturæ destinando, amoris indicia dederat, multiplici, ac generosa gratitudine compensare intendebat.

Robertus autem cum status mutatione suum quoquè animum nō immutauit. Sed nunquam sui dissimilis inuicta stabilitate

quicquid semel aggressus fuerat prosequen-
 batur, nullis omnino parcendo laboribus,
 ut Religioni pareret fructum, & splendo-
 rem Christiano nomini posset conciliare.
 Etenim si coluerat antea in omni vitę suę
 parte innocentiam, ac probitatem; tunc
 inter grauissimas rerum occupationes ni-
 hil vnquam prius habuit, quam ut DEVM
 veneraretur, & Sodalitatis legibus solutus
 secundum leges eiusdem viuere videretur.
 Quare sicuti prę ceteris obedientię tueba-
 tur virtutem, ita in omnibus suam consu-
 luit Religionem, & eius Superiori cum vo-
 luntate semper iudicium quoq; submitit.
 Quo verò ad ea, quę propriam disciplinā
 intuentur hanc viuendi formam sibi pro-
 posuit. Summo etenim mane ut primum
 enigilasset Cœlestium bonorum Contem-
 plationi ferme per horam vacabat. Dein-
 de diuinum officium capite detecto, vel
 genibus flexis, vel stans cum summa deuo-
 tione soluebat. Sanctissimum Sacrum &
 quotidie, pręter quam deuexa iam ætate
 propter corporis imbecillitatem intermit-
 tere aliquando coactus fuerit, libabat.
 Cœteras canonicas preces sua qualibet
 hora recitabat; nec non Officium B. MA-
 RIÆ VIRGINIS, & Rosaria in honorem
 Domini Nostri & Sanctissimæ MARIÆ
 Matris eius minime præteribat: quo tem-

pore erumpens in lacrymas reperi-
 tus fuit. Vespere ante quam necessari-
 se committeret quieti spatium temporis in
 his, quæ die transegerat reuoluendis consu-
 mebat, & pijs fundendis precibus. Somni
 fuit adeo parcus, vt sapissimè superioris
 temporis partem, qua cubili recipiebatur
 (quod secundum instituta Sodalitatis suæ
 feruare solebat) in diuinarum rerum con-
 templationem conuerteret. Postremo ve-
 rò, quod è grauissimis & quotidianis oc-
 cupationibus, quas Purpurata dignitas re-
 quirebat, quod dico supererat temporis,
 id totum in celestibus perscrutandis mis-
 terijs, vel ijs, quæ edidit, scriptis condo-
 nabat componendis. Domesticis suis tria
 præsertim alia inter multa indixit prohibi-
 ta, ac seuerissimè conseruauit: Blasphē-
 miam nimirum, carnis illecebras, & pu-
 gnas; quæ omnia tanto infectabatur hor-
 rore, vt firmo remanente decreto à se di-
 missos, qui in hæc inciderent declararet.
 Pluries in annum ipsemet illos celesti pa-
 ne reficere volebat, & prius pijs monitis
 præparare. Quotidianas preces in-
 stituit, quibus ipso, quasi præeunte omnem
 circa familiam adesse volebat. Illis præ-
 scripsit ne vnquam aditum vlli prohiberēt;
 nemo enim ad eum accessit officium peti-
 turus, quem non exciperet benignè ac fo-

meret si posset : si vero non posset sua deuin-
 ctum non dimitteret integritate. Etenim
 simulandi arte caruit, & à verborum, pro-
 lixitate alienus omnino fuit. Nec rarò de
 breui suo censu detraxit, vt agestati con-
 suleret eorum, quorum polulationibus
 aliter subuenire minime poterat. Difficil-
 limè adducebatur, vt quemquā à sua expo-
 sita voluntate arceret. Nullam voluit su-
 pellectilem, & tātum iussit asseruari ea, quæ
 ad necessariam desiderarētur sustentatio-
 nē, & modesta posceret dignitatis conser-
 uatio. Opes, & ornatus seuerissimè repu-
 diauit, eorum verò, quæ dignitatis gra-
 dum intueri possent, extitit Zelantissimus.
 Munera sine Pontificis venia, quam pe-
 nē nusquam quæsiuit, neque accepit ipse,
 neq; vnquam voluit accipi à suis, præter
 quædam vulgaria esculenta & poculenta,
 quæ etiam rarò sumpsit; dummodo non
 prouenirent à Religiosis. Ea enim obfir-
 mato animo respuebat, & adeo inhorruit
 vt Cœlestine Congregationis protector ele-
 ctus grauitè ferret, quod quis è suis in eo-
 rum Monasterio, ne quidem potum sume-
 ret, & ad hoc euitandum sæpius ad eos nō
 accedere affirmaret, & cum non nunquam
 euenerit ipsum occasione Capituli alicu-
 ius, vel Congregationis, in eorundem Mo-
 nasterio refecti cibo coactum extitisse, nul-

lis eorum precibus adduci potuit, quia statim expensis facere satis imperasset. Congregationibus Sanctę Inquisitionis, Indicis, Rituum, & Examinis Episcoporum præfectus diligentissimus intererat, nec ullas functiones Cardinalitias ommittebat, nisi iusta causa detineretur. Vt causas etiam ex quibus dispensationes à Pontifice concedendę essent internosceret, nec non Breuiarium Romanum, vna cum Cæsare Cardinale Baronio, & Syluio Cardinale Antoniano reformaret, fuit illi demandatum. In Ecclesia S. Marię in Via, cuius titulo Cardinalatus erat insignitus, singulis Dominicis, & fœstiuis diebus perorabat, & de ijs, quę ad veram Religionem pertinent dicebat multa. Summam pecunię in ægenos illi Curę subiectos liberaliter distribuebat, ac certum statuerat censum diuidendum ijs, qui eandem Ecclesiam, vt Doctrinam Christianam apprehenderent, adibant. In ipsa quoque Ecclesia restauranda, & ad magnificam, ac recentiore formam reducenda non vulgarem pecunię vim insumpsit.

Caput interim ampla, & honorifica Ecclesia Roberto fuit à Summo Pōtifice commissā, vt etiam particularis gregis onus subiret is, qui pro Vniuerso tam amplas, & vtilēs dabat operas. Et profectō renuis-

set ille, qui altam, & propè diuinam Virtutem postulabat in ijs, qui curam gerunt animarum, dum de sua propria demissè sentiebat: nisi ipsimet se obtulisset obedientia, qua superiorum iussis ita semper presto erat, vt ad ipsorum nutum non solum voluntatis sed etiam iudicij cōsensum paratum soleret exhibere. A summo igitur Pontifice cōsecratus Archiepiscopus, si cui in animo cognoscere est, qua nouū sibi designatū munus ratione pertractarit, agnoscat ex exemplari, quod extat ad Episcopum Theanensem Nepotem suum conscriptum. Alia enim cum non docuit præter ea, quæ prius executioni mandauerat. In nouem controuersias opus distribuit, quibus breuissimè, quæ Episcopo necessaria sint ad salutem æternam in tuto ponendam demonstrauit. Quarum prima de non appetendo Episcopatu. Secunda de Residentia Episcopi. Tertia de Officio eiusdem, quod nimirum teneatur prædicare. Quarta de Ordinatione Clericorū. Quinta de Beneficiorum multiplicatione. Sexta de Modo agendicum Principibus sæculi in tuenda Ecclesiæ libertate. Septima de modo agendi cum consanguineis, & affinibus. Octaua in quos vsus erogari debeant redditus Ecclesiastici. Nona de perfectione Episcopi, inscribuntur.

Robertus autem non solum Episcopatum non appetijt, sed omnes speciosos titulos, honorumque insignia formidauit. Extat adhuc Chirographum eius manu conscriptum, & confectum rationibus, quibus imbecillitatem suam longe imparem esse Cardinalitio oneri suadere attentabat. Scimus ab eodem Pōtifice Politianam Ecclesiam, quæ proximis præteritis diebus Synulfo Bencio dulcissimo suo Pastore & parente caruerat, illi oblata (vt primo tempore Cardinalitios sumptus commodius suppeteret) renuisse, ac respondisse simul; hos redditus se cæteris concedere, in sua sodalitate cubiculum, veluti singulis Patribus nunquam sibi credere defuturum. Et quidem nec aliud seruasset nisi Pōtificio præcepto Archiepiscopatum Capuanum delatum ei fuisset. Nec nō testantur, qui eum audierunt Societatis Iesv Religionem prælegisse, cuius institutum humilitatis, & paupertatis erat.

Gregem verò suum nō deseruit vnquam, sed omni cura super ipsum inuigilauit, & à Pontifice pro Vniuersalis Ecclesiæ Republica Romæ postea detentus, eidem, vt alteri pastori Ecclesiam suam committeret gubernandam, renunciauit. Visitauit igitur, & pauit omnes, & singulas Oues suas; Et in earum visitatione primum Ecclesias

adibat, & pro concione dicebat aliqua, ac ne curatos expensis grauariet, proprijs sumptibus ea, quæ sibi, ac suis viderentur necessaria, comparabat. Custodias & Calices ipsemet, vbi opus esset, ad decentiorem reducebat statum, vel renouabat, & insuper ipsorum inopiæ liberali manu succurrebat. Magna ex parte Rituarij Romani ceremonias, quæ adhuc minime seruabantur, induxit. Prouincialem Synodum cōfecit. Quo plurima instituit optima ac pessima deleuit. In porticibus, & Ecclesiæ introitu nundinas, ex quibus Clerus, & Archiepiscopalis sedes prouetus quosdā recipiebat, prohibuit. Virginum quoddam Collegium soluta admodum disciplina, corruptisque moribus ad veterem sobrietatem, & Sanctimoniam reuocauit. Binos Ecclesiæ Canonicos, & binos illius Ciuitatis nobiles præfecerat, qui cum Thesaurario suo singulis mensibus pauperes in solitudine verecundos visitarent, & eorum subleuarent calamitatem. Doctrinæ Christianæ scripsit explanationem, qua fidei Tyrones facillime Catholicis imbuerentur legibus, & institutis: Singulis festis solemni aderat celebrationi, & tempore Quadragesimali excepto (quod alteri committebat) per se publicè concionabatur. In Clericis maximè ad titulum Patri-

monij promouendis parcissimus fuit, & ne Sacerdotium contéptibile redderetur, cordi maximè habebat. Quare accidit perpè, quòd cum Sacerdotes supplices videret ad stipem manum porrigere, tanto concuteretur horrore, vt potius in se irruentes manus tollerare se voluisse affirmaret. Illis tamen eius non denegabatur liberalitas, cum præter elemosinam benignè simul moneret, quòd ad suos redirent Episcopos, qui ipsos alere tenebantur, vel si Religiosi essent, sua peterent Monasteria.

A pluribus autem beneficiorum titulis seuerissime abstinuit. Quare duas Abbacias, S. Benedicti nimirum in ipsa Ciuitate Capuæ, & S. Mariæ ad Procidam, resignauit, nec primæ propinquitate, ac præsentia, cum eiusdem Ciuitatis esset Archiepiscopus, se tueri voluit. Imò non solum beneficia à se abdicare contentus, ipsarum pensionum redditibus spoliauit. Et ex decem, ac quatuor millibus annui prouetus, quæ Pontificis liberalitate ei collata fuerat, quatuor, & circiter millibus tantum sibi reseruatis, demum penè ad indigentiam se redegerat. Pientino Episcopatu eo quod breuis redditus nominaretur pensionem quingentorum scutorum sibi reseruata condonauit, dummodo, & ipse Episcopus ducenta, quæ super alio tenui Episcopatu

possidebat, statim deleteret, ac remitteret.
 Ecclesiasticæ libertatis diligentissimus
 extitit Custos, ac conseruator, & ne ea,
 quæ ad vniuersalem pertinent modò attin-
 gam, Ecclesiæ suæ iura, ac bona longè am-
 pliauit, & præcipuè in tres primarios, ac
 potentes Principes vindex fuit, quibus ta-
 men in maximo semper fuit honore & ac-
 ceptissimus. Cum reliquis vero Primati-
 bus, & Regijs Præfectis semper communi
 omnium acclamatione coniunctissimus, ne
 minima quidem aura fluctus commouente
 tranquillam obtinuit pacem, & beneuolen-
 tiam, & talem de sua fide, ac integritate
 consignarat opinionem illorum animis, vt
 nihil prorsus eius voluntati denegandum
 putarint. Vt pote qui optimè nouerant
 Robertum solo Dei timore & honore du-
 ci, vt Ecclesiæ suæ libertatem defenderet;
 nec aliud expetere, nisi quod cum summa
 coniunctum esset æquitate. In reliquis ve-
 rò eorum amicitix percupidum occurrere
 humanissimè, illam recipere, ac retinere.
 Et quidem sui muneris initio prudenti &
 optimo consilio omnium sibi deuinxit ani-
 mos, cum illis legem, Religionem, pacem,
 fidem se habere in consilio; libidinem au-
 tem, audaciam, metum à se amota profi-
 teri per nuntium aperuerit. Et ideo ro-
 gauit ne quid ad suum Imperium perti-
 nens

nens unquam decernerent, nisi matura pri-
mum mente utranque intellexerint partem.
Se a vera, & recta ratione nunquam discesi-
surum.

Confanguineos autem suos, & affines
illo prosequutus est amore, ut eos non locu-
pletaret, sed dirigeret ad Patrem. Quare
ut pauperes illos aspexit, & ut minus ege-
rent, aliqua tantum distribuit. Germano
Fratri, qui ex præteritis fortunarum diui-
sionibus in Bellarmina domo pluries factis
rem diminutam habebat, & copia proli-
gæuabatur; eam reddituum suorum assi-
gnauit portionem tenuem, qua rerum fa-
miliarium defectus ad sustentationem tan-
tum supplere posse censeret. Cæruinam
Familiam, quam arctiori vinculo neces-
situdinis, & peculiari instinctu plurimum
adamabat, penè iacentem & summi fasti-
gij in quo Marcellus Secundus paulò ante
collocatus fuerat prostratis insignibus, san-
guinis ferè tantum reliquas, & veteris no-
bilitatis gradum retinere respiciens, dum
compatiebatur, etiam terrenæ felicitatis
despiciendam esse fragilitatem & infirmi-
tatem; æternam verò, quæ sine amittendi
timore possidetur, inquirendam, sapissi-
mè monebat. Reliquis verò, quos egeret
còpertum habuit opportunè subueniebat,
quorum vero bona in reuocem licet vidum,

cultumq; satis esse cognouit, augere seuerissimè abstinuit. Et quidem ne minimum Ecclesiæ prouentum in eorum vsus Robertus erogasset, nisi consilio ductus esset eorum, quorū doctrinæ & auctoritati acquiescere nunquā recusauit. Grauiissimi enim non defuerunt viri, qui hoc disertissimè pertractarint, & firmissimis probauerint argumentis, Robertum suorum debuisse succurrere ægestati. Attamen eam sibi irrenocabilem proposuit regulam, & moderationē, vt de ijs quicquam statui minimè pateretur, nisi ex speciali auctoritate, & licentia suæ societatis Superiorum.

Bonorum vero Ecclesiasticorum dominus non extitit, sed procurator tantum & dispensator. Quare illos in pauperes, & diuinum cultum, largè, effusèquè erogauit, ea sibi solum reseruando, quæ ad modicam sustentationem satis essent. Plurimis statas designarat summas, quæ singulis mensibus largirentur. Ijs, qui pro certa summa alieni æris vinculis detinebantur, proprijs suis sumptibus liberandis Præfatum decreuit. Nemini, qui Roberto è domo egredienti, vel redeunti occurreret, stipēs denegabatur. Nemo poscebat qui non obtineret. In Choro vero diuinis interesse horis nunquam prætermisit, & præbende prouentus, qui Archiepiscopo equa-

liter, ac cæteris Canonicis debentur propria manu distribuere pauperibus volebat, eo speciali animi affectu, quod tunc verè de proprio daret. Illis Ciuitatibus ac Regionibus, vnde Ecclesiastici fructus proueniebant, certam partem semper voluit destinatā, utpotè ad pauperum illarum subsidium præcipuè commissos percenseret. Maluit autem omnes iuuare, & aliquando decipi, quam nimius esse in peruestigando, ut si in alterutro esset offendendum, mallet cui non oppoteret dare, quam non dare, cui oppoteret. Hospitium indè constituit, quo Peregrinos liberaliter exciperet, & omnium fermè ordinum aduenas humaniter tractaret. Cathedralem ipsam Ecclesiam nouis decorauit ædificijs, in quibus non mediocres sumptus fecit. Chorum quippè in medio Ecclesiæ Monastico ritu positum asportauit, & ad recentiorem reduxit formā: Sacellum pulcherrimis distinctum marmoribus perfecit. Ianuam qua cum breuius pateretur iter, transeuntes mercia per Ecclesiam vehebant, clausit, & aliud in ea deuotum extruxit Sacellum. Aedes Archiepiscopales restaurauit, auxit, & ornauit. Minimam quam potuit partem in suos conuertit vsus & commoditatem: Vestitus enim tantum effugiebat inhumanam, exquisitam vero oderat formam.

Cardinalitijs vestibus, quibus sui Cardinalatus initio a Clemente Pontifice donatus fuerat, tempore quo obiit adhuc utebatur. Subtus serica vel pretiosa vestimenta nunquam suscepit, & vnico indumēto pro qualibet specie contentus, illud consumptum etiam resarciri iubebat, & quoad poterat vsus, tandem pauperibus deferri demandabat. Subtus lineis, & primis caligis, ac tibiālibus (pro ritu Societatis suę) nunquā detulit. Parietum ornatus nō holosericos, & auro distinctos, sed pelliceos ac vulgares vix retinuit. Quare certum cubiculum, quod protus denudatum erat, proprium appellabat, Cetera aduenarum, & Cardinalitię dignitatis. Mensę apparatus nullus extitit, sed terrea vasa; frugales cibi. Ministrorum, & eorum, quę exteriora intuebantur, mediocritatem seruauit, ac omni penē luxu carens dignitatis honorificentiam coluit. Illud prę ceteris institutum habuit, quod in fine cuiuslibet anni rationes componeret cum omnibus, & quod superesset statim Pauperibus distribueret. Nullos vnquam agros acquisiuit proprios, nullum ædificium possedit.

Episcopalem verò perfectionem, quam nos ex quarto loco eius cōtrouersiarum ad Episcopum Theanensem in vltimum contulimus, per paupertatem, Castimoniam,

ac obediētiam adeptus est. Diuitias enim suas non tanquā proprias ad possidendum, sed ad dispensandum vt alienas extimasse supra iam diximus. De puritate, ac castimonia nullam vnquam Carnis titillationem sauiorem sustinuisse videtur. A prima enim ætate vana seuerissimè vitarat colloquia, quod cæteris adeò erat notum, vt ad Roberti ingressum cõponi modestè omnes viderētur. Vocum varietatem ac interval- la è musicis apprehendens nulla vnquam impudica sibi proponi passus, sacra solum censuit decantanda. Nec desunt adhuc plurima, quæ Robertus profanis mutatis verbis in Ecclesiastica conuertit. Mulieres autem sine testibus, imò sine familiæ suæ interuentu nunquam fuit alloquutus, & ab impudicitie sordibus intactus, nec minus inhonestè prolata intelligere apparebat. Nobili quadam puella, quæ sanguinis necessitudine non longè aberat à Roberto in matrimonium collocata, Pater ad ipsum per litteras detulit, & non tam præ nouitate matrimonij, quam futura prolis indi- eijs in filia nouiter à natura excitatis, letabatur. Obscurum & minimè expeditum fuit hoc Roberto, qui huius naturalis causæ cognitionē nunquam inquisierat. Quare euidam qui tunc fortè aderat explicandum imposuit & quidem circumcisè ac compo-

sitè eloqui iam exeperat ille, cum Robertus eius sermonis intercluserit viam, & maxime aborrens, qua vigilantia puritatis sue candorem custodiret clarissime patefecit. Obedientiæ studium quibuscunque rebus potuit semper ostendit. Pontificiæ voluntati adeò se reddebat promptum, ut in arduis etiam pertractandis causis, nec modestè quidem pluries instandum sibi esse perceniret. Superiori etiam Societatis addictissimus, protector Monialium Sanctæ Marthæ Ordinis Divi Augustini, sine speciali eius licetia constitui minime fuit passus, eo nimirum cōsilio, quòd seminarum regimen Societatis instituta prohiberent.

Robertus igitur ijs studijs in populo sibi commissio rectè gubernādo occupatus, vite æticiæ & cōtemplatiæ perfectionem adeptus, in Charitate Dei, orando, contemplando, laudando, & magnificando, & in Charitate proximum docendo, exhortando, excitādo, & increpando, tempus consumebat; atq; à nostris exemptus affectibus diligens populos suos ut filios & filias cogebat omnes ad sui venerationem. Dum Clemētis Octavi Sanctissimi Pontificis elatione funere Romam accersitus ad Pontificia comitia cōtendit. Verum nec voluit à populo suo disjungi, quin prius seriò illum moveret, & pia relinqueret instituta.

Romæ itaq; reuersus nihil aliud in Pontificis subrogatione cordi habuit, præter Christianæ Reipublicæ Salutem & sine ulla Orationis ambiguitate, quid in hoc sentiret patefaciens, etiam in sequentibus comitijs nullius precibus aut studijs adduci potuit, vt à propositis vnquam discederet. Leone autem Vndecimo Pontifice creato Robertus nullo temporis intervallo discessum præparabat, & ad sui Gregis personalem curam rediisset, nisi Pontifex Sexto & Vigesimo die extinctus omnium luctu Christianam Rempublicam orbatam reliquisset. Et ipse Paulus Quintus in Regimine suffectus, absolute Roberto hoc statim denegando pro Vniuersalis Ecclesiæ seruitio Romæ commorari iussit. Intimis enim Pontificem obsecrat precibus, & postea grauissimis rationibus, vt ab illa mente illum deduceret, suadere conatus fuerat. Episcopum ex præcepto (aiebat ille) iuris diuini teneri ad residendum personaliter in suo Episcopatu omnibus prædicasse; à proprijs dictis facta dissentire minime debere. Sed cum nihil proficeret, & Pontifex integritatem eius miraretur potius, quàm probaret consilium, submisso de more animo, gregem saltem suum alteri Pastori gubernandum committi petijt, & Ecclesiæ suæ professionem à se abdicauit: cum Pastoris

diceret nomen sibi non deberi, dum Pa-
 storis munere fungi minimè posset. Obtulit
 quidem Pontifex, qui Vniuersalis uti-
 litatem particulari gregi præferri voluit,
 quòd Vestigalibus haud incommodis il-
 lius Ecclesiæ sibi retentis, quemquam ex
 suis consanguineis, aut familiaribus nomi-
 naret. Sed omnia recusauit Robertus, & li-
 bero iure Ecclesia remissa, rogatus vt ali-
 quem saltem proponeret; Illustrissimum
 Antonium Caietanum elegit, quem nuper
 Sanctissimus Dominus Noster GREGORIUS
 Decimus Quintus in sacrorum Patrum cœ-
 tum assumpsit. Et Henrici Cardinalis (cu-
 ius virtutem, & Doctrinam presertim in
 Gallia Robertus probauerat eximiam) Ne-
 potem non degenerem prospiciens, aptio-
 rem ad Pastorale munus existimauit. Ca-
 pia igitur nouo Præsule decorata, Roberto
 Pontificis & Caietani liberalitate quatuor
 millia annui redditus, quo Cardinalatus
 insignia sustinere posset, constituta fue-
 runt; Et ipse Robertus Urbis & Orbis re-
 giminibus assistere delectus, omnes suas im-
 plere curauit partes. Et vt quò grauissimæ
 magis crescerent occupationes, eò per-
 fectiores in dies redderet virtutes suas,
 Doctrina & exemplo Christianam Rempu-
 blicam diligenter docere nunquam de-
 sitit.

Et primum quidem in plurimis scribendis operibus maximè pro Vniuersi salute egit, partim vt dogmata Sanctissimæ nostræ fidei impugnantes confutaret, partim vt sacras explanaret scriptiones, & partim vt rerum Diuinarum meditationibus mentes reficeret singulorum; & quos in via Dei ambularent, promoueret, quos vero ab ea recederent, reuocaret. Quorum earum quæ in lucem Colonia Agrippinæ edita septem voluminibus contēta leguntur, numerare præteribo: Et referam ea solum, quæ in illis desiderantur, nimirum Roberti Cardinalis Bellarmini responsio ad librum Iacobi Magni, Brittanie, & Scotiæ Regis, cuius titulus est. Βασιλικὸν ἄδελφον, idest munus Regium. Item Roberti Cardinalis Bellarmini examen ad librum falsò inscriptum. Apologia Cardinalis Bellarmini pro iure Principum &c. authore Roggero VViddringtono Catholico Anglo. Item explanationes in plurimas Epistolas D. Pauli. Item Compendium de Hæresi, nec non adsunt lecturæ in Sacram D. Thomæ Theologiam. Sed non præteribo maximè pro Ecclesia Dei inter varias distrahasque perfidiosorum hominum opiniones & sectas fuisse momenti, multos ad CHRISTI fidem traduxisse, plurimos vero in ea conseruasse. Et quidem inter

tot filios, quos Ecclesiæ Dei peperisse dicitur, duorum referam exempla.

Primum Iusti Caluini, qui dum Bellarmini opera confutandi gratia legeret, sensim illuminatus, & argumentis illorum victus, pluribus temporalibus bonis dimissis ad Catholicam fidem singulari Dei vocatione fuit conuersus. Postea verò Romæ hospes à Cesare Cardinale Baronio humanissimè exceptus, in Latheranenſi Ecclesia vna cum fratre suo à Clemente Pontifice, Sacri Chris̄matis vñctione & Venerabilis Sacramenti alimonia proprijs manibus reſectus, vt in illo Veterum errorum, ac hæresum vestigia penitus delerentur, expuñcto odioſo Caluini Cognomine, Iustus Baronius nuncupari voluit. In Germaniam deinde reuersus ab Archiepiscopo, & electore Moguntino Aulico, & spiritali consilio adscriptus, ac ijs præsertim, quæ extirpandæ hæresis, & propagandæ Catholicæ fidei operam nauant adhibitus, Ingentem fecit fructum in conuersione hæreticorum.

Alterum exemplum erit Beniamini Antonij Canerij Anglici, Theologiæ Doctoris, qui cum Regius esset Concionator, Canonicus Canthuariensis, Decanus Theringensis, Rector Romanensis, & Vicarius Thomhamiepsis, non modo his, sed spei

etiam multo ampliori communionem Ecclesie Catholice Bellarmini operibus commendatam prætulit. Ideoque per litteras egit illi gratias pro Animæ suæ libertate & salute. Scripsitq; quòd cum Bellarmini doctrine lumen declinare, & iniquissimorum hominum calumnias ferre non posset, domi relictis libris in Musæo suo Canthuariensi simul cum reliquis bonis, & fortunis vniuersis, se per occasionem aquarum Spadanarum, & itineris Palatini subduxerat, & apud Colonienses Catholicæ Ecclesie addixerat se in æternum: sicuti Apologia scripta ad Regem, & ad Primarios viros plurimis litteris patefecerat.

Nec quidem minor fuit Bellarmini cura in varijs soluendis difficultatibus, seu molestijs detergendis, ac consilijs dandis, qui ex diuersis terrarum Orbis partibus quotidie coram, & per Epistolas ad ipsum confluebant. Cum eos paternæ amplecteretur Charitate, & humanissime responderet. Romæ vero Sanctæ Inquisitionis, Sacrorum rituum, Indicis, Examinis Episcoporum, cæterisque pro tempore Congregationibus, quibus ut dictum est, præerat, qua sollecitudine, qua prudentia inuigilauerit, quam sapientissime eius responsa omnium assensu admirarentur, nemini est obscurum. Politianâ Cathedram

sibi ab Illustriss. Roberto Cardinale Vbal-
dino illius Ciuitatis Præsule præstâtissimo,
dum pro Apostolica Sede Nuntius in Gal-
lia moraretur, enixè commendatam rexit,
& Capitulo illius Constitutiones à Marcel-
lo Secundo confectas restituit obseruandas,
additis non nullis, quæ pro tempore op-
portuna videbantur. Cum ijs vero, qui ad
eum conueniebant, de Deo, de rerum
humanarum fluxu, de Christiani nominis
officio differere multa, vel saltem si tem-
poris breuitas hoc non permetteret, aliqua
intermiscere colloquio solitus erat. Domi-
singulis Dominicis quadragesimalibus, &
S. D. Nostri aduentus pia aliqua comme-
morabat, tali simplicitate, vt animos sua-
uissimè mulceret, & non inanes & vanissi-
mos plausus, sed veram contritionem inge-
neraret cordis; Domesticiis autem & quo-
tidianis sermonibus ad pietatem & veram
perfectionem suos inuitabat continuo; nec
quisquam Bellarminum alloquebatur, quin
aliqua ad æternâ salutem spectantia audi-
ret. Hæc verò tanta prosequabatur facili-
tate, vt plenè omnes intelligerent omnium
scientiarum facundiam cum vera Sanctita-
te in illo esse coniunctam. Nullis autem
administris, & laborum suorum auxiliato-
ribus vsus vnquam fuit, sed ipsemet propria
manu conficiebat omnia, tali vbertate, vt

quoties in dies salutandus, vel supplicandus à quolibet appeteretur, occurreret, & illo dimisso suam statim prosequeretur scriptiōem, ac si nullo temporis intervallo fuisset distractus. Quare operum suorum Originalia eius manu cōscripta & nulla penè litura reperiuntur coinquinata.

Sed cum optimè sciret nihil ad animos populorum promouendos vitæ ac morum exemplo esse efficacius, hoc etiam instituere omnes documento nunquam defuit, & ut cœlestibus magis expeditè vacare posset virtutibus, eam rerum terrenarum despicientiam semper habuit maiorem, quò in altiori humanæ fœlicitatis & existimationis gradu collocaretur. Quare à diuitijs non alienus solum, sed omninò abhorrens locupletibus tanquã miserrimis compatiebatur, & sua lætabatur paupertate. Principi cuidam Cardinali, qui in suo ætatis flore cum splendore familiæ, animi etiã internis ornamentis copulatis, Doctrinæ, & pietatis Vniuerso cōstituebat exemplar, iam diu, dixit Robertus in vitæ Sanctitate profecturus es, quoad diues factus non sis. Alteri autem, qui in quodam familiaris colloquio sexaginta millia annui redditus Ecclesiastici se habere dixerat, hilariter, & per iocum respondit Robertus, nihilo tantum redditum suum superare: ex

numero enim sexaginta millia detracto nihilo, idest figura, 0, sex millia solum remanent, quæ tunc temporis ipse possidebat. Plateam autem S. Mariæ Rotundæ Vineam suam appellabat pulcherrimam, domi propinquam, ex qua vberes fructus breui dispendio continuo percipere posset. Aliam se non habere quidem, commodiorem vero nullam percensere. His enim ingeniosis, & lepidis sermonibus non raro utebatur Robertus, ea tamen retenta gravitate, ut spectabilis, & admirandus ac simul facilis, & gratissimus omnibus redderetur. At illud in primis apparebat solida virtute, & constantia terrenas substantias pro frivolis, & inanibus omnino ducere. *¶* Consanguineorum autem, & suorum affinium amorem, quo singuli solent agitari, ita à se abdicauerat, ut eorum commotionibus imperturbabilis redderetur. Cessit è vita Angelus de Acraria Theanensis Episcopus, & Roberti ex Sorore Nepos. Cessit Thomas germanus Frater; Cesserunt affines alij, sed non cessavit Robertus eadem animi æquabilitate, nec turbidos quidem motus egerere, solum enim sollicitè indagabat extremum illum transitum, quæ devotione in eò temporis articulo sacris fuerint expiati, quæ Religionis, & pietatis

signa dederint; Et hostijs, ac precibus pro
 illis exorabat. Lugubres, & pullas veltes
 nunquam deterre voluit. Se Confanguineis,
 & mundo mortuum esse, inanibus ijs
 mortalium sollicitudinibus renunciatis, so-
 lum Deo vivere profitebatur. Condolue-
 runt plurimi, & mœstas Roberto dederunt
 litteras quibus germanū eius fratrem opti-
 mum virum se perdidisse querebantur.
 At non indoluit ipse, sed longè digressus
 respondit, se maximè lætari huius vitæ la-
 bores terminatos illum habere, & ad tran-
 quillum gaudij portum appulisse. Scripsit
 eidem Antonius Ceruinus Pater meus, ex
 Alexandro Marcelli Secundi germano fra-
 tre, & Hieronyma Bellarmina Roberti al-
 ter Sobrinus, doluitq; Marcella Bellarmi-
 na, eiusdem Roberti germana Sorore, & ex
 S. Agnetis Ordine Sanctimoniali Religiosis-
 sima, communes nostras familias caruisse.
 Benignè quidem, vti solebat Robertus re-
 scripsit, egitquè gratias; At se quadraginta
 annis in Religione consumptis his minimè
 curis ac molestijs affici significavit; imò
 magnoperè oblectari morte affinium suo-
 rum, quorum ad gloriam sempiternam
 ductricem fuisse sperare posset. Monuit
 eundem Franciscus Maria Frater meus ger-
 manus, genitumq; ex Maria Bellarmina,
 ex fratre germano Roberti Nepote su-

sceptum, & ipsius patrui nomine decoratum, è vita adhuc infantulum sublatum fuisse afflictabatur; At minimè doluit Robertus; imò respondit, quòd præ morte illius, sicuti in discessu filiorum sui germani fratris egerat, nec minimas guttas lacrymarum, & doloris effundere posset, licet conaretur: Sed quidem lacrymas gaudij, & latitiæ cum fermè sciret eos ad Supremas Beatorum sedes peruenisse, ac fuisse lucratos tam cito bonum illud, de quo ipse penè septuaginta nouem annorum laboribus defatigatus minimè erat securus. Scripsit tandem Roberto Camilla Bellarmina germana Soror, ac præ coniunctione & beneuolentia præ ceteris sororibus in se semper perspecta, intentissimis precibus postulauit veniam conueniendi Romam, uti fratrem amantissimum, quem ne dum Cardinalitijs insignitum vestibus viderat, salutare ante suum obitum concederetur, ac minimè cōsensit Robertus, imò ex templo monuit, cupiditatem illam diabolicam esse tentationem, & ideo Signo Crucis fugandam: Et quòd cum essent ambo morti propinqui, futura, non præsentia, IESU CHRISTI passionem, nō vanitates, & pompas huius mundi ipsis cōtemplādum esset: imò quòd si illa sciret quot sollicitudines, & molestias sequerentur purpureas illas vestes,

vestes & tranquillitatem, qua fruebatur, dum Societatis I. E. S. V. gestaret habitum, ipse habuisset pro certo, quòd illa se potius Religiosum, quam Cardinalem respicere cupiuisset. Hæc autem omnia illius proprio Chirographo conscripta reperiuntur.

Nec minori moderatione amoris usus fuit Robertus in Patriam. Miserat Politianum Capitulum binos Canonicos, qui ad Beatissimi PAULI Quinti pedes humiliter prouoluti precarentur, vt Gregem illum Pastoris iam diù Orbatum concedere vellet, posse recreari Bellarmino, quem Cardinalem ne dum aspexerat, cuiquè iucundum fore, populum sibi commendatum vîsitare, ac non ingratum pro salute; patrio in æstiuis caloribus perfrui aere. Et quidem iam destinauerat etiam ipse Robertus Politianum adire, vtpotè qui pro Animarum Salute nullos effugiebat labores. Sed cum Pontifex Vniuersalis Ecclesiæ seruitio, cui ille erat intentus, pro particulari Cathedra detrahendum non esse respondisset; Roberto verò si pro corporis sui salute conseruâda & oblectatione animi concessisset; negasset verò, si pro administratione illius Ecclesiæ sibi eundem censeret; à proposito statim animum flexit, & à Politiano abstinuit. Cœlestinæ Congregationis Protector côsuevit Robertus eius

Generalis electioni maximè vigilare, & singulos, quorum suffragia ad illum deligendum requirerentur, pijs monitis saltem, vel per Epistolas, vel per administratos pruenire. Anno verò MDCXII. ipsemet assistere voluit. Quare Sulmonę generali illorum Capitulo conuocato conuenit. Hic supplicationibus indictis Concionibus & pijs Colloquijs illorum animis promotis summo omnium consensu Generalis effectus est. Robertus autem ijs constitutis, quę ad Religionis disciplinam pertinerent, discessit, & S. Marię Angelorum Sacratissimam Imaginem venerabundus, vti iam diu vehementer optauerat, petijt. Hic Roberti aduētus Politianis peruulgatus maximam attulit voluptatem. Cum enim triginta milliaria à Patria & Consanguineis distare tantum audissent; redditusquē ad Urbem illo tantum spatio prorogaretur, incredibili omnium gratulatione ad se accessurum expectabant. At negauit Robertus nullisque germani fratris, qui illi occurrerat, & familiarium suorum precibus dimoueri potuit, quin statim rediret Romam, suosquē subita animorum mutatione mærore affectos relinqueret. Ecclesiastici status fines egredi veniam non petijssē à Pontifice, illoq; inconsulto sibi illicitum duxisse postea affirmavit.

Terrenas autem laudes & dominatus nō contempsit solum, sed omnino aufugit. Quare si consanguineis & affinibus suis, qui eius assumptionem ad Cardinalatum gratulati fuerāt, cito occurrens rescripserat: Nouē dignitatis gradu extolli eos non debere, & eos precari, quod summo hoc omnium Auctori referrent, maiestatemq; suam implorarent, vt ab illo nouæ potestatis fulgore suos non fineret perstringi oculos, & ab æterna illa cœlesti gloria per hoc temporale fastigium se non præpediri; Nunc quantū ab ijs deterreret, factis comprobabat; Et si in precedentibus comitijs, quæ pro Pontifice deligendo acta fuerant, vt patres illos à sui electione securius redderet alienos, se originem ducere à parentibus longæuis, vitæquē tenacissimis, quasi per iocum loquendo insinuabat, Thomam Bellarminum, & Flammattam Taurusiam ex Patre, Riccardum verò Ceruinum, & Elisabettam Machiauellam ex Matre, viuacissimos & penè nonagennarios dicens habuisse parentes: Nunc quantum abhorreret ab ijs diū magis, ac magis demonstrabat. Agebat enim Robertus pro sui muneris officio, dum intusus, & familiaris à consilijs illum admonuit, cauendum esse, ne committeret aliqua, quibus Regios offenderet. Præfectos, eorumq; læderet.

voluntates, qui facile suis ad summum etiam fastigium obesse possent rationibus. Sed his minimè commoueri respòdit, imò se Pontificem esse omnino nolle, & Marcelli Secundi Nepotem se profiteri, qui in Concilio Tridétino pro Pontifice Legatus etiam contra necis minas, quædam, quæ à recta ratione dissona sibi videbantur, denegauit. Ingrauescente verò ætate, cum vnius auris vsum penè perdidisset, certo sibi fore impedimento ad supremum munus lætabatur. Se magis debere Cardinalium Senatui, ipsquè in primis, qui summum ei magistratum non detulerant, quam Clementi Octauo & Petro Cardinali Aldobrandino, qui in Cardinalem eum delegerant, publicè proferebat. Nec tamen ignoramus, qua animi gratitudine Aldobrandinam familiam coluerit, Qua veneratione de Sanctissimi Pontificis Clementis pietate fuerit loquutus, quo ornatu de eius magnificentia dixerit, qua animi ingenuitate innumera in se beneficia illius commemorauerit, quam Prolixè & iucundè de eiusdem morum facilitate, & paterna clementia sæpius differuerit; sicuti etiam scimus, illum, si non par gratum, saltem suæ beneuolentiæ & obseruantia munus in Petrum Aldobrandinum semper retulisse. Splendorem illius gentis ea, qua sibi licue-

rit; contentione fouisse. Illustrissimum
D. Hippolytum, sicuti Sanctissimus D. No-
ster GREGORIUS Decimus Quintus in
Cardinalem assumpsit, pluries exoptasse,
& petisse. Robertus igitur à supremis
abstinere non contentus, propria etiam di-
gnitate se abdicare tentauit. Quare do-
ctissimos consuluit viros, vt Cardinalatum
omnino deponeret; Sed cum nemini hoc
concessum fuisse sibi propositum audis-
set, ac in primis Nostri temporibus Diuo
CAROLO Borromeo, & Roberto de Nobil-
libus Politiano Iulij tertij Pronepoti, cu-
ius insignem Religionem Bellarminus ma-
ximè venerabatur; se continuit, eorumq;
& Marcelli Ceruini Auunculi sui Magnæ
pietatis opinione præmortui vestigia re-
spicere nunquam destitit. Quare illorum
& aliorum Cardinalium, qui Sanctitatis
reliquerunt odorem Imagines sibi ad in-
tuendum & imitandum expositas habere
voluit, nec nõ acta sæpissimè legere, & per-
censere consuevit. Cum nihil magis mo-
uere diceret, quàm præcepta Christiana-
rum virtutum ad praxim redacta conspice-
re, sibiq; ante oculos proponere res gestas,
& insistere operibus illorum, qui nostræ
eiusdem conditionis, & muneris præces-
serint: Et quidem se posuisset Robertus pu-
blica saltem negotia, & se recepisset soli-

tudine ab humanis curis vacuus, si Cardinalatus dignitatem sustinens suo munere non fungi licitum iudicasset, sed reseruandum duxit ad illam ætatē, qua in Vineæ Dei laborare nō valens, pijs solū meditationibus ac precibus prodesse posse videretur. Mortales intereā plausus vitabat omnino, & occurrentium frequētiā, qua ducendus, & reducendus erat eam voluit solum, sine qua de dignitatis gradu detrahi potuisset. Humilitatis Christianæ custodiebat virtutem vigilantissimē, & ab omni fastu abhorrens submissū cuilibet se præbebat & humanissimum. Pauperes etiam nec dum stare coram se capite aperto patiebatur, famulos & aulicos suos, veluti extraneos associare sapissimē visus fuit. Nec rarò accidit, quod de nocte à cubiculo, in quo studijs morabatur intentus, discedentibus domesticis lumen ipsemet gestans præbere tentasset, & aliquando præbuisset, donec ad eos, qui assistere solebant, peruenirent. Operum suorum mentionem facere consuevit nunquam, & laudantem aliquem audiens rubore suffusus, sermonem aliò vertere conabatur. In lucem edi minimē unquam fuit passus, nisi prius alieno comprobata iudicio, & quia cum humilitate sapientiam ita habebat coniunctā, vt neq; humilitas de doctrina, neq; doctrina de humilitate

te quicquam detraheret, sicuti modestè & constanter contra impugnantes defendit sæper & obtinuit: Ità iustis sua supponere, & nō nunquā etiam in quibusdam, licet minimis, de quibus nec ipsimet illi dubitarēt, eorum sequi iudicium minimè recusauit.

Ab ijs ergo terrenis affectibus liber, eas etiam in dies diligentius amplectabatur virtutes, per quas veluti per septem gradus ad apicem perfectionis progreditur. Et cum vera primum prudentia omnes suas ordinabat actiones ad verum & optimum finem, & per vera media nihil aliud præter Animarum salutem quærebat. Quare veritatis cultor eximius, quantum inter prudentiam, & astutiam interesset, demonstrabat. Et ideò nō solum mendaciorum, verum etiam perplexi sermonis ita erat inimicus, vt ne quidem in alieno ore vnquam reperiri posse crederet; qua animi simplicitate contētus vltimo etiam suæ vitæ tempore mendacium cuiusdam veluti barbaram artem detestans; reciprocā animi & verborum rectitudinem in suis præcipuè Illustrissimis Collegis semper inuenisse professus fuit. Capuæ Sacerdos quidam impuditiæ crimine accusatus, cum se Virginem testaretur, credidit Robertus, & in Sacerdotis ore mendacium existere non posse respondit. Grauioribus autem in

causis pro fidelissimo cōsiliario habita primum oratione ad Deum, liberè & consideratè omnibus, & cuicunque hominum generi sua aperiebat consilia. At ijs præsertim, quibus pro conscientiz ductu à dignitatis suæ munere postulari percensebat. Nec Pontifici etiam Summo quid de eligendis Episcopis, quid de bonis Ecclesiasticis distribuendis, & de Concilij Tridentini observatione sentiret, pluries significare destitit. Scripserat illi quidam; & intimis occurrerat precibus, ut auctoritate sua ad Episcopatum se foueret promouendum. Nec tardè rescripsit Robertus cum S. Bernardo, cunctantes solum & renuentes assumendos, eos verò, qui pro se rogant, iam iudicatos esse. Reuocarunt hæc animum illius, & clariore oborta sibi luce excitatus, in eam deliberationem ingressus fuit, ut de non appetendo Episcopatu libellum inscriberet, & Bellarmini submitteret iudicio. Et quidem nō defuit postea Robertus insignibus eius virtutibus auditis Summo Pontifici eundem proponere, & ad Episcopatum idoneum existimare. Hanc verò æquitatem, & animi candorem talium modestia, & facilitate Robertus coniunxerat, ut omnium sibi deuinciret animos, & adeò promptos redderet, ut ardua, ac difficilia plerunque negotia ad optatos

fines perduceret. Ita Cœlestina Religio-
 nis Protector cum Paulo Quinto Pontifice
 & per litteras cum Ludouico Christianis-
 simo Rege sedulò, & studiosè agens in obe-
 dientiam eius generalis singula Gallicę na-
 tionis Monasteria, quę iam per spatium
 centum annorum ab eo defecerant, rede-
 git, & Patribus illis per Reuerendissimum
 D. Celsum Amerigum Abbatem Genera-
 lem inuisis, & Parisijs quibusdam in gene-
 rali Capitulo stabilitis, implicitum, ac sanè
 inuolutum negotium summa omnium pa-
 ce & consensu absoluit. Ità etiam grauif-
 simam inter Lucensem Rempulicam, & eius
 Ciuitatis Episcopum controuersiam, quę
 nullius adhuc labore & diligentia sedari
 potuerat, mirè composuit. Lucensibus sa-
 tisfecit, Episcopo placuit, & omnium gra-
 tulatione inter illos primam restituit be-
 neuolentiam.

At non solum prudentiæ humanę, verum
 etiam supernaturalis, & præuidentię do-
 num habuisse Robertus videtur. Henrico
 Caietano in Galliam proficiscenti, in re-
 ditu Pontificem superstitem non inuenien-
 dum dixerat. Syluio Cardinali Antoniano,
 qui tunc apud S. Marcum erat Clementis
 Octauæ Camera Magister, Pontificem tres
 & decem annos victurum prædixit. Eodem
 Cardinale Caietano Romę ægrotante, fun-

debat Robertus ad Deum assiduas preces,
 ac pro valetudine de se benemeriti exora-
 bat: Cum sacrum faciēs, dum de more pre-
 caretur, audiuit in Spiritu hanc vocem.
 Siste, quia morietur, nec amplius viuet.
 Cum verò ipse orare prosequi vellet; ite-
 rum, ac tertio his ipsismet verbis deturba-
 tus fuit. Sacrificio igitur peracto de Ca-
 ietano sollicitus diligenter sciscitans, mo-
 netur conualuisse, & præcedenti Vespere
 Ecclesiam S. Potentianæ adiisse. Quare
 lætus Robertus, & hanc diabolicam illu-
 sionem fuisse credens, illis, qui tunc ade-
 rant, patefecit. Sed altera die Caietanus
 recidit infirmus, & vitam finiuit. Capuam
 ingressus Idibus Maij MDCII. in libello,
 quo eius Ciuitatis Archiepiscoporum no-
 mina designata permanent, ipsi allato su-
 um ita descripsit; Robertus Cardinalis
 Bellarminus Capuæ Archiepiscopus sedit
 tribus annis. Ludouico verò Aragatio Po-
 litiano & familiari suo, qui huius rei cau-
 sam quæsiuit, respondit ille, in ea Ciuitate
 tribus annis, ne dum elapsis se commora-
 turum. Nobilibus quibusdam per Capuam
 transeuntibus inuitatis, cum se illius hospi-
 tes in reditu futuros promitterent; se non
 inueniendum fore respondit, sicuti res se
 habuit: Moritur enim Pontifex, & ipse
 Romam redijt. Clementem verò Pontifi-

cem incunte Mense Martio. m d c v. perit-
 turum, & se reditum Romam, pluries in-
 dixerat. Paulo Quinto ad Pontificatum
 elato communis Itatim manauit sermo,
 quo maturus illi vaticinabatur decessus.
 Robertus tamen, cum de hoc Aragatium
 differentem audisset, ait. Ne huiusmodi
 fabellæ fidem prestes: Pontifex enim diu
 viuet; cum verò an per decennium roga-
 retur, longè diutius indicauit. Episcopo
 Theanensi Nepote suo ægrotante in domo
 professa Societatis I s v Neapolis; Mo-
 nuit Robertum quidam Pater se bono ani-
 mo esse, Episcopum melius habere in dies,
 & pristinæ sanitatis recuperandę dedisse si-
 gna; Sed extemplò rescripsit ille despera-
 tam valetudinem Nepotis esse: ad vitę exi-
 tum illum comparari monendum: nec diu
 stetit, quin morbo maiorem in modum
 aucto vitam finierit. Hieronymo de Oddis
 vtriusquę Signaturę Referendario, & Audi-
 tori suo, qui die decimaquinta Ianuarij,
 m d c x x i. exponebat vidisse quãdam lit-
 teram extraneis ex partibus prodeuntem,
 ex qua indagari posse videbatur Paulum
 Quintum Mense Augusto proximo moritu-
 rum, respondit Robertus ad decimi sexti
 anni sui Pontificatus finem illum non per-
 uenturum; nec ipsemet præterijt Mensis,
 quod è vita discessit. Ijs, qui in Curru cum

Roberto vltimum Conclauē ingreffuro am-
 bulabant, futurum Pontificem GREGORII
 nomine appellandum fore diuinauit. Qui-
 dio de Amicis Canonico Capuano ſibi
 mortem proximo mēſe Septembris, & in
 Solemnitate S. Franciſci affuturam aperuit.
 Vgo Fantius I. V. D. Politianus, qui ad
 Robertum humiliter in Vaticano ſalutan-
 dum, & veniam pro diſceſſu petendam
 Calendis Iulij acceſſerat, mira hilaritate re-
 pletum illum inuenit, qui precata primum
 ſœlicitate, inter cœtera digito quaſdam
 pias Beatorum è Societate IESV Imagines
 designans dixit, hæc ipſamet verba. Cito
 ad eos volo conuolare, & ad eos volo con-
 uolare ſine dubio, & ad eos volo conuola-
 re citò, citò: Mattheus Tortus Theologus
 Papienſis Roberti familiaris, & Octauius
 Chiarella eiufdem cubiculi adminiſter, læ-
 thalem in febrem inciderant, ſed cum ma-
 giſ ipſum Tortum grauatum audiſſet, ſa-
 nitatem annunciandam illi comiſit: Chia-
 rellam verò periturum manifeſtauit; Nec
 aliter res ſe habuit: cum breuiter Tortus
 valetudinē redegerit, Chiarella verò obie-
 rit. Cubiculi tandem ſui adminiſtris dum
 in Vaticano præterito Mēſe Auguſto pe-
 des illi lauarent, vltimò hæc ſibi præſtari
 affirmauit. Altera virtus, quam cordi habuit Ro-

62

bertus fuit Iustitia, quæ leges omnes diuinas adimplere, & singulos, quos præu-
ricatores nosceret habere odio, ac si quo-
modo posset à præuicatione compescere,
in dies magis ac magis curauit. Et qui-
dem testantur eius familiares, nec vllum
veniale crimen ab eo vnquam voluntariè
perpetratum aspexisse. Proximos, verò in-
credibile est, quàm intimè doleret Rober-
tus, quoties declinantes à lege audiret,
& quo desiderio succederetur succurrendi
populis ijs, qui in periculo morarentur.
Germaniæ afflictabatur incendijs, Belgij
querebatur calamitatibus, Galliæ compa-
tiebatur perturbationibus, & communis
Religionis horrebat pericula, nec alibi cor
suum, & sermones vertere scire videbatur.
Ac tandem tam auidè Iustitiam sitire cœ-
perat, vt sapissimè mortem expeteret, & ab
illis Christianæ Religionis miserijs segre-
gari supplex audiretur.

In ea verò Iustitiæ parte, quæ particu-
larium administrationem respicit, etiam in
tribuendo vnicuique suum fidelissimus ex-
titit. Et primum, vt ab alieno reddere-
tur securus, contentiosa maluit cedere, quàm
lites suscipere. Pauperibus liberaliter da-
re, & in vsus suos quàm minimum retinere
quotidiè reddebatur vigilantior. Quare
non solum superuacua, quæ Pauperibus

debita reputabat, sed victui & vestitui suo necessaria subtrahere, & in pias personas conuertere solitus fuit. Maria Christerna, & Leonora Ab Austria Serenissimæ Archiducissæ. Quæ Halæ sanctimonialem vitam ducebant, Crucem quandam pretiosam, & auro ac gemmis distinctam Roberto, cum quo pro spiritali beneuolentia pijs ac deuotis Epistolis sæpissimè cōferebant, dono miserant. Et quidem Robertus earum liberalitatem cellitudinum, ac titulum deuotionis respiciens, ne in asperitatis nomen incideret, repudiandam non censuit; sed ijs, quas poterat gratijs redditis, illam vendidit, & pecuniam, quam collegerat, intulit in Eleemosinas. Nec alium seruauit ordinem in ijs, quæ per Anni solemnitates à consanguineis vel amicis suis esculenta, licet rara & vulgaria, recepisset. In maximo etiam frigoris algore, & inclemetia succendi in cubiculo suo ignem difficillimè patiebatur, & ijs, qui ad eum cōfluebant discedentibus, ardentia ligna, & aliquando totum ignem extinguere propria manu visus fuit. Cereis lucernis ad extremum vti, & maxima parsimonia voluit: Et summo mane, vt primum dies oboriretur, sublatis illis aeri exponebatur, quod aliquando illi non mediocris fuit detrimenti. Sed Pauperibus detrahere nolle

hoc, quod in ijs inaniter expendisset proficebatur. Illa pauperum esse non sua, quorum procuracionem quodammodo gerens vt propria sibi vindicare non liceret. In alios tamen eam seruauit æqualitatem, quod peccare in nimio rigore, & ijs, quibus æquum esset, denegare minimè pateretur. Quare familiaribus suis non solum determinatam & honestam pecuniæ quantitatem, qua dum quisque pro suæ vitæ sustentabatur opportunitate, communem & tranquillam obtinebat pacem, sed etiam cuilibet eorum pensionis vel beneficij aliquis prouentum contulit, vt pro diuersa gradus qualitate, ipsorum occurreret necessitatibus. Consanguineis verò illos Ecclesiasticos redditus conferre denegauit; quibus locupletiores effici possent; assignauit verò eos; ad quos pro temporum varietate eiusdem Societatis Patres & Superiores impulerunt rationibus ijs, nimirum, vt minus egerent, & vt priuatam ac vulgarem vitam illis gerentibus, ad virtutes obstructus non relinqueretur aditus. Mariæ, Hippolytæ, & Cyntiæ ex eodem Fratre germano Nepotum, cum primum ad congruam ætatem peruenerint, diligenter explorato consilio non defuit, quin Ceruinæ primam familiæ; Taurusiæ secundā matrimonio collocaret; Tertiam verò Sancti-

monialem efficeret; & cum honesta ac vulgari dotis impensa sanguinis sui puram & antiquam nobilitatem conseruandam curaret; Et sicuti necessaria illis impertiuit, ita in ceteris, licet, quæ ad decentem & honestum ornatum concedi solent, de suo impendere negauit omnino. Sed animæ tantum intentus profectui, pijs monitis & incitamentis instruxit, & ad omnem illas confirmauit pietatem.

Tertia virtus qua se exercuit Robertus fuit fortitudo & patientia, qua superabat difficultates omnes, quæ bonas operationes impediunt, & fortiter dimicando aduersus diabolicas tentationes assiduos tolerabat labores, nunquam à publicis & grauiissimis Aulæ occupationibus feriendo, & studiorum interponendo perpetuitatem. Hac se contra hæreticorum fraudes peritissimum adornauit, & improborum fucata studia seuerè declinare promptum præbuit, Et operam dedit adeò pertinacem, vt non rarò noctes etiam insomnes duceret perscrutando, & inquirendo remedia, quæ malis imminentibus adhiberi possent. Hac fuit semper animo ita præsentī in molestijs, & sollicitudinibus, vt nunquam à sede rationis, & religiosa constanter aberraret. Quare nec minori animi magnitudine existit Robertus in corporis sui perferendis doloribus,

doloribus, quos non modo inuitus, sed libenter etiam appetebat. Excruciatus enim fuit hoc suæ ætatis tempore Crurium intumescencia, quæ non modicam requirebat sæpè curationem, necnon exiguos excitabat angores. Vexatus est aliquando Pituitæ distillatione, & descensu, qui stomachum offendens adeò fastidiebat; vt cibos haustusq; omnes respirare cogeretur. Sustinuit nõ nunquam acerbissimos etiam & asperissimos dolores, à renulis, & calculis illatos, quibus maximè afflictabatur. Nec minori laborauit molestia, cum in Monte Cassinati dexterum brachium è suo loco dimouit. Petierat enim ille, cum septuaginta quatuor esset annorum, illa visitare loca SS. Benedicti, & Scolasticæ nobilitata reliquijs; & cum Montis difficultatè ex se superare minimè posset, dum æquum ascēderet corruit, & dexterum adeò confregit, vt non breuib; remedijs opus habuerit. His tamen morbis nunquam Robertus fuit adeò exterritus, quin clariori semper fortitudinis & patientiæ documento, etiam dum in lecto decumberet & grauius laboraret carnis passionibus ad custodiam humilitatis à Deo sibi collatas asfereret, & in vnius Dei commemoratione summa cum voluptate acquiescens, etiam pro eius amore atrocioribus affligari cru-

ciatibus desiderio succenderetur. Imò maxima flagraret cupiditate vinculis corporis dissolui, CHRISTVMQVÈ Dominum, & Redemptorem videre suum facie ad faciem. Quapropter sicuti quotidianas cogitationes & colloquia sua inter has defatigationes corporis in aliud, quam in diuina voluntate indaganda & querenda æterna gloria non infumebat. Ità Medicorum dictis se præbebat obedientem, & in illis suæ salutis curam omninò proiecissee apparebat. Etenim ex eo solum conqueri magnopere audiebatur, quod nimirum lecto affluxus à publicis laboribus, à studijs, à Vigilijs, à Ieiunijs, à Sacrificijs, ab Horis Canonicis prohiberetur, & non nunquam mentem etiam à cœlestibus rebus & meditationibus iuberetur auocare. Hæc enim præcepta licet pro viribus obseruanda curaret, adeò tamen grauabatur, vt sapissimè ad animum leuandum, & corporis mitigandos affectus ipsimet illi, qui negauerant, eadem concedere cogèrentur. Cum verò loco moueri, & gressum penè instruere inciperet, nihil ei longius videbatur, quàm suos reuocare labores, & Medicorum effugere curas. Nec dum dexteram è Monte Cassinati reuersus recuperauerat ad operationes idoneam; imò vix ossibus suo loco repositis accerrimos euaserat dolores, quod à sacri-

ficando se continere minimè patiens veniam à Pontifice impetrauerit celebrandi, & leua tantum Sacratissimam Hostiam eleuandi. Sed ijs, quę natura dabat tolerāda minimè contentus, plurimas quotidie inueniebat patiendi vias. Et primum morbis prædictis vexatus, tam differebat curari, quā diū simulandum sibi liceret. Doloribus aliquando pressus frigus præteritis diebus se tolerasse eximium, eiquē causam tribuere illorū fuit fassus. E lectulo surgere solus, & sine vllis ministris, vestes summo manē sibi componere consuevit; Pelliceis & Chirotecis vti etiam per summam hyemem, & dum præ frigore tumidas haberet manus, denegabat: leues seu grauiores vestes per anni mutationes nunquam poposcisset, nisi Administri eius calore vel frigore pressum videntes, proprio consilio accommodassent. Muscas, & similia animalia, quę molestissima esse solent, sustinebat patienter, & illas etiam viuere debere, suis solebat dicere. Flagellis corpus suum cedere aliquando etiam in hac vltima ætate non præteribat. Singulis annis à publicis recedebat negotijs, & in Nouitiatu Societatis suæ Deo solum vacans, ad mortem se comparabat; cuius tali desiderio tenebatur, quod ad se quasi blandimentis inuitare videretur, & quia

eam complecti non poterat, animo saltem & cogitatione fortiter delibabat. Neque proximis annis quicquam frequentius iterare colloquijs solitus erat, quam se breui moriturum; Et propterea libellum de arte bene moriendi inscriptum editionum suarum terminum esse velle. Ac deinceps de fluxis caducisque corporis & fortunæ bonis; De Gloria Beatorum; de Gehennæ supplicijs; de extremo iudicio; de propinquitate mortis, ac similibus differebat sæpius; ijsq; se contulerat reuoluendis libellis, quos de ascensione mentis in DEVM, de felicitate Sanctorum, de Gemitu Columbæ; de Septem verbis Domini in Cruce prolatis, & de arte bene moriendi ediderat, cæterisq; etiam ab alijs confectis, in quibus propriæ mentis refectionem inueniret.

Quarta virtus Roberti, & quidem eximia, fuit temperantia, qua sensualibus delectationibus frenum iniecisse videbatur. Etenim in Virginitate illum consenuisse, si vitæ eius respiciamus continuatos & nunquam dissimiles actus, dubitari minimè poterit. Quo verò ad Sobrietatem attinet parcissimus, gustatum funditus perdidisse, ac solum simplici Cichorio, & Lactucre recreari videbatur. Nullum ædilium, vel genus condimenti indicere consuevit; nihil

inter edendum questus fuit, licet cibaria male cocta conditaq; fuerint. Vno tantum ferculi genere vti voluit, & illo vulgari & parabili. Mensam verò Sacrae scripturae ac Sancti cuiusquam vitae lectionibus nec non in fine Martyrologij Romani ornatam habuit. Nequē cineralia cæteraquē ab Ecclesia ex præcepto imposita tantum, sed etiam in Sanctissimi Domini Nostri aduentu, in quarta & sexa feria, alijsque diebus per annum ieiunia seuerissimè obseruabat.

Virtutibus Cardinalibus expeditis, veniamus ad Theologales, quarum prima est Fides. Hanc verò Robertus tam strenuè tuebatur, vt illam non solum verbis & operibus profiteretur, sed præ cæteris etiam ad eam excitandis cogitaret assiduè & eruditè, scribens pro Ecclesia Dei, Dauidicę Turri assimileretur fortissimè. Pro hac hæreticorum ardentia & ignita tela extinguere, excipere, ac retorquere quærebat continuò, & tam fortiter propugnabat, vt fidei defensor acerrimus appellaretur. Et quidem pro firmanda, fouenda, & amplificanda Religione gemere sæpissimè audiebatur, ac plorare coram Domino, intimoq; commoueri, & fodi videbatur animo, quoties nequissimorum Spirituum argumenta varios seducere commemoraretur.

Quia autem fides spem ac fiduciam ligi

gnit ingentem, quæ est alia virtus Theologalis. Ideò Robertus in omnibus per Orationis medium benignitatem adibat diuinam, & in fide nihil hæsitans certò credebatur DEVM sibi affuturum. Ac grauissimis viris minimè erat ignotum, ipsum à DEO nihil ex proposito petere, quod non impetraret. Capuæ nobili cuidam mulieri, quæ sensibus destitutis iam proximè ad mortem accesserat, signo Crucis in fronte peracto sanitatem obtinuit. Alteram verò scæminam à Demone vexatam, Ieiunijs & oratione ab illo impurissimo spiritu, quid vult iste Bellarminus exclamante, absoluit: Per manus impositionem & Orationem Religiosum quendam liberauit à Parètum susurru ac vocibus, quas perpetuò ad aures suas habens diu agitatus grauissimè cruciabatur. Ipsimet deniquè Roberto requiescere à laboribus suis, & in Domino obdormire in die dicato Festiuitati S. Frācis, sicuti præ speciali in eum deuotione optauerat, concessum est. Hac etiam spe ferebatur in DEVM, & voluntatem excitabat suam ad æternam felicitatem sperandam, dum per adoptionis spiritum, vt verus filius & Hæres DEI, ad Regnum æternum aspirabat, & suspirabat assidue; & cum solum in infinita DEI bonitate sustentaretur & misericordia, ac ab ea tantum

penderet, in rebus ideò humanis nihil per-
fugij collocabat.

Superest postrema Virtus, sed verè ma-
gna, & Virtutum cæterarum Regina Cha-
ritas DEI ac proximorum, cuius officia
exactissimè Robertus exercere vehemētius
quotidie curabat: Et primum præ DEO,
quem diligebat verè, reliqua omnia duce-
bat nihil, & quantislibet pressus curis, cum
illum videre sicuti est, adhuc minimè pos-
set, in quotidianis beneficijs commemo-
randis & contemplandis pulcherrimis eius
operibus dulcedinem illius experiebatur
continuò. Imò per Charitatem in DEO
manebat, DEO inhærebat; in DEVM ter-
minabatur, In DEO sedem habebat; ac
pro eius amore omnia minimo negotio pe-
ragere, sine labore laborare, ac summos
dolores sine doloris sensu perferre videba-
tur. Diuini verò honoris Zelo ita erat in-
census, vt alioquin mitissimus in diuinas
puniendas offensas ardentè sitiret, ac in
blasphemantes presertim, pēnas incitare
scriptis suis, & vocibus destiterit nunquam.
Quia verò Charitas se extendit ad omnia,
quæ à DEO facta sunt: Ideò per DEVM
Robertus illa adamabat, & pro proximis
præcipuè quælibet subire paratus, singulas
quærebat vias, quibus illos iuuare posset.
Quarè pro Animæ primum & corporis de-

inde illorum Salute gerere nunquam intermisit. Infirmos crebrò inuisebat, & ijs vigilabat in primis, de quorum salute dubitari sentiret. Audit aliquando magnum quendam virum morti propinquum, ità securum de sua salute discedere, vt omnibus bono animo esse diceret, se saluum fore. Extimuit Robertus, ne diabolica fraude illuderetur, nec destitit, quin citissimè occurreret, & illius saluti prospiciendum curaret. Eidem vice quadam domum redeunti ingressum præ pauperum frequentia impeditum, cum quidam è suis tentaret, & in vnum ex illis ità licet inuitus offendisset, vt ad terram impulerit, molestissimè ferens Robertus illum repræhendit, ac simul exorauit, ne impofterum suum ita perturbaret animum, & pauperes, quos sciret esse pupillas oculorum suorum, tam inhumaniter tractaret. In pauperem febris laborantem, & in via prostratum cum incidisset, in suo asportari voluit, & quiescere curru, donec, qui ad Xenodochium illum adducerent, reperirentur. Plurimos, quos per plateas iacere prospexit in Hospitalis domum deferri mandauit. Ipsorum enim sicuti ex corde compatiebatur calamitatibus, ità in omnibus, vt poterat subueniebat. Cæteros autè singulos maximè respiciebat Charitate, ac si quos erga

se ingratos & inhumanos reperiret, hos speciali prosequeretur dilectione, & singularibus tuebatur beneficijs. Neminem persequi, imo nec habere odio profitebatur; sed industria quadam benevolentiam, & amorem in se alebat omnium, & illud observabat in primis, ne quid vnquam admitteret, cur quispiam posset indignari. Ideo neminem ab eo iniuriosè tractatum fuisse scimus, ac ne quidem appellatū acerbius. Suis etiam si quid præcipiendum esset, rogare solebat, & ne vllum grauaret molestia, curabat diligenter. Nec raro accidit, vt in suos administratos à cubiculo dormientes offendens excitare minimè fuerit passus. Et vel ex se cōfecerit, vel distulerit, quod illis esset imperandum. Pedisequos, cum aliquando Vaticanum adiens, vidisset pluuia grauari, In tertio collocari curru iussit, cæteris familiaribus in primo, & secundo vocatis, quæ tam amanter gerebat, vt omnes planè intellexerint, quod tanquam filij ab eo diligebantur. Singularum quærimonias perbenignè audiens, dum vnicuiq; satisfacere procuraret, ad pacem illos præcipuè adhortabatur. Ex hac incensa charitate in proximos compassio etiam quædam redundabat in brutæ animantia, cæterasq; Creaturas Dei, quas maximè defatigari & exerceri crudeliter,

tolerabat molestissimè ; & aliquandò se continuit domi , ne equos à quiete , & refrigerio reuocaret.

Hæ autem spectatissimæ virtutes , quibus in omni vitæ suæ parte , at in nouissima præsertim floruit Robertus , adeò communem illi cōcitabant gratiam , & honorem , vt ad extremum vsq; actum perpetuò plausu fuerit probatus , & ab omnibus vt spectabilis & simul amabilis honorificentissimè exceptus . Puer enim adhuc , & adolescens , à parentibus & maioribus diligitur præ ceteris ; à fratribus verò & æqualibus habetur in honore , in studiorum certamine dux , & moderator cæterorum veneratur . In Religione adhuc Tyro à Iacobo Layne Præposito Generali vti veteranus . CHRISTI miles aspicitur .

In Monte regali à Sabaudix Duce concionans auditus talem ipsius inuit gratiam , vt mirum in modum semper aucta etiam totius eius Serenissimæ prolis in Bellarminam domum , & præsertim in Robertum ex Thoma germano fratre eius Nepotem , & SS. Mauritij , & Lazzari magnum Equitem adhuc redundet . A Diuo CAROLO Borromeo dum Mediolanensis Ecclesiæ erat Archiepiscopus , è Belgio , sed frustra repugnātibus eius Societatis Superioribus , expetitur . A Gregorio Decimo tertio , vt

una cum Philippo Nero, quem nunc inter
 cœlestes Spiritus colimus, & Francisco Ma-
 ria Taurulio etiam Politiano, deinde Car-
 dinali Estasis & reuelationum cuiusdam
 Religiosissimæ Sanctimonialis decernere
 rationes, designatur. A Fœlice Cardinali
 Peretto, qui postea Pontifex electus Sixtus
 Quintus nominatus est, summa habitus
 estimatione editionibus operum S. Ambro-
 lij opera & consilio adhibetur. In Gallia
 à Lotharingo Duce suauissimis eius mori-
 bus degustatis, perpetua beneuolentia do-
 natur. Parisijs ab Alexandro Parmæ & Pla-
 centiæ Duce, & exercitus Hispaniarum Re-
 gis moderatore, cum ut Nepos Marcelli
 Secundi recognitus doctissimis ornamentis
 insignitus videretur, tractatur honorificè.
 A Duce Bauariæ ut Philippo deinde Cardi-
 nali & Ferdinãdo nunc Archiepiscopo Co-
 loniensi filijs, dum Romæ moratur, existat
 à confessionsibus rogatur. Tusculi à Ioan-
 ne Riccio Politiano Cardinale penè inuisus
 amanter complectitur, & familiarissimæ
 consuetudinis, quæ inter illum & Marcel-
 lum ipsius Bellarmini Auunculum interces-
 serat, efficitur successor. Cæsari Baronio,
 Syluio Antoniano, & Francisco Mariæ Tau-
 rulio Cardinalibus eo amoris vinculo co-
 pulatur, ut disiungi minimè posse videan-
 tur, & dum Clemens Octauus Ferrariæ de-

git, Venetias dulcissima consuetudine vna petant. Philippo Hispaniarum Regi adeo extitit carus, vt gratissimam illius promotionem ad Purpuram Clementi Pontifici significet. Ipsi verò eidem Pontifici intimus à consilijs summis requiritur in causis, & paterno habetur amore: Nec desunt Epistolæ quibus cum Robertus Capuæ esset ab ipso Pontifice rogatur, vt liberè moneat, quæ sibi pro Ecclesia Vniuersali videantur opportuna. Eandem verò Capuanam Ecclesiam gubernandam maxima populorum gratulatione & frequentia ingressus, illud venerationis & amoris simul consequitur, vt vestes eius pietatis causa deuotissimè tângantur, & communi omnium voce, & salutatione discessus deploretur. Etruriæ autem magnis Ducibus, sub quorum felicissima ditione ortus erat, & FERDINANDO presertim primo gratissimus, à COSMO Secundo, & MARIA MAGDALENA ab Austria eius vxore, ac CHRISTINA Lotharinga Matre erga Serenissimam Mædiceorum familiam Patris nomine insignitur. Iacobus Dauit Cardinalis Perona suis impressit operibus, se libentissimè Bellarmini discipulum professurum, & eius scripta in Gallicam linguam conuerti fecit, vt Heretici, qui latinam ignorarent, illa legere, ac ex ipsis commodius fructum percipere

possent. Cum verò aliquandò apud Bellarminum se criminatum comperisset, quòd in eius doctrinam aliqua contumeliosè conijceret, honorificis ad illum statim occurrit litteris, quæ adhuc seruantur, & diabolica hæc machinamenta detestans, potentissimis argumētis in se contortum crimen diluit, ac summoperè dolens præ his Satanicis artibus, quæ Bellarminum & eius opera veneraretur, clarissimè comprobat. Sygismundò Poloniæ Regi quam esset carus, plurimè testantur vtrò citroque alterius ad alterum Epistolæ transmissæ, quibus summa cum fide & beneuolentia de grauissimis agitur rebus. Henrici verò Quarti Galliæ Regis illud in Robertum audiuius studium, vt cum de Subrogando Pontifice Clemēti Octauo extincto tractaretur, Gallicos monuerit Patres, gratissimum sibi fore, si in Bellarminum suffragia, & diligentiam suam deferrent. Rodulpho, Matthiæ, & Ferdinando Imperatoribus, nec non Vniuersæ Austriacæ familiæ speciali semper extitit in amore, & veneratione. Sanctissimi autem Domini Nostri GREGORII Decimi Quinti, & LUDOVICI Cardinalis Ludouisi eius Nepotis honorificum prospeximus officium, vt ad se illum receperint, quo ab intimo consilio vterentur. Ceteros tandem tam primarios, quàm Me-

dios, infimosquē Viros inter se de amore in Bellarminum, & venerationis significatōnibus decertasse tenent memoria omnes.

Nec, dum Catholici singuli maxima veneratione Bellarminum intebantur, defuerunt ij, qui capitaliores eius erant inimici, quo magis à fide aberrarent; illum etiam habere in honore, & admirari, & primum Vitacherus Calvinista ad Cęcilium Anglię Thesaurarium scribens, Virum sanē doctū, ingenio fœlici, iudicio subtili, lectione multiplici pręditum Robertum iudicauit. Franciscus verò Tunius, Duo, ait, apud multos, & ad miraculum vsquē illum esse assequutum. Vnum quod diligentia suę collectę, & cinni laboriosissimi ex Pontificiorum omnium sententijs comportati pellexit multos, vt libros ipsius de Doctrina Christiana, & Controuersijs locis eius consulerent: alterum quod nouatio istius operis multorum animos inflammauit, vt idem scriptum legerent. Daneus Rabiosissimus Minister, & conuiciator, varię lectionis, & diligentię honestam Roberto tribuit laudem, & prędicat, ac memorię, & assiduę Patrum lectionis nomine gratias illi agendas dicit existimare. Cuius autem quidam Hamburgensis notę Calvinistę ad amicum suum scribens de quodam libello, in quo A nouimus scriptor Bellarmini famam ma-

ximè carpebat, inter cœtera ait crimina in Bellarminum coniecta pro mendacijs meritò à Sapientibus quoscunque adierint reputari, nec consideratione digna censi: Imò apud seipsum nullam fidem inuenire, sed simplicis solum turpisquè fabellæ locum obtinere, cum presertim Bellarminum esse superstitem certò constaret & non lateret, quid de simillimis Viris illutribus ageretur; Finxerat enim illius libelli Auctor Bellarminum Lauretum animi expiandi causa adiisse, & ibi propter conscientiam scelerum, & salutem obijisse desperatum, ac ex eius libro confessionis, quem secum attulerit constituisse crimina, quæ ementitè ipsi obijciebat. Addidit igitur Hamburgensis illud tantum existimare dolendum, quod tales cartas alienę famę prædatrices impunè cudere, & recudere liceret. Michaël Coletus etiam precipuus Lutheranae professionis, Gedani propugnator, cognito, quod fabula ista Gedani recusa esset in concione edixit, mendaces has criminationes in eum Virum cadere non posse, quem eruditio & doctrina tot libris comprobata aliter vitam instituisse convincebat.

- In Gallia autem Plessens Magnus ille inter magnos Hæreticus de Bellarmino loquens in operibus suis, suum Bellarminum

appellauit. Demum Iudeus quidam, qui Roma proximè discesserat, cum in colloquia inter Oliuas nonnullos Gedanensium Senatorum, & R. Philippum Alderum Oliuensis Monasterij Ordinis S. Benedicti Priorem incidisset, dum de Roberto illi dicerent eadem, quæ dictus Anonimus auctor e mentitus fuit, Prior verò negaret; Iudeus tunc incolumem Bellarminum esse, & ad omnem honestatem, integritatemquè compositam vitam ducere pronunciauit: Iudeos verò omnes si Catholicos, aut magnam partem eorum ad normam Bellarmini mores suos exigere viderent, illicò à Iudaismo ad Catholicam Ecclesiam accessuros. At minimè missum velim ipsum Angliæ Regem propriò in Cubiculo Roberti libros retinere, eiusquè virtutem inuidiam mortalium omnium superasse videri, ac dici posse.

Sed ipsi etiam D E O Bellarminum gratum multis ab hinc annis testari voluit Diua Catharina. Hæc enim Sanctissima Virgo Religiosum quendam Virum alloqui sapissimè solita, cum de Roberto sciscitaretur, his verbis respondit, Diu viuet, & opera eius erunt placita D E O.

Septuagesimum interea Robertus agebat annum sensibus quidem integris, sed corpore propter inaudita Vigiliarum, & laborum

borum ab infantia suscepta incommoda
 satis attrito, dum obitus sui tempus nosset
 propinquum, & appeteret, à Summo Pon-
 tifice magna indultia contendit veniam,
 ut sibi proximè è viuis excessuro liceret pu-
 blicarum occupationum onere deposito
 ad suam redire Religionem, & quietis lo-
 cum; vbi ex toto corde pœnitentiam age-
 re posset, & pijs meditationibus ac pre-
 cibus ad illum nouissimum diem, à quo
 omnium summa dependet, præparare se fe-
 licet enim tota eius vita pœnitentiæ fuerit
 tempus, & comparatio ad bene morien-
 dum, in his tamen postremis diebus multò
 diligentius sibi inchoanti similis. Animæ
 suæ tantum vacare, & in conspectu solius
 DEI flere intendebat. Quare Octauium
 Bandinum Sanctæ Inquisitionis Cardina-
 lem Decanum, cui pro veteri & mutua be-
 neuolentia inherebat coniunctissimus In-
 tercessorem apud Sanctissimum adhibuit.
 Venia igitur Pontificis impetrata in do-
 mo probationis Societatis suæ octauo Kal.
 Septembris anni proximè elapsi secesserat,
 & cœtera negotia sepositurus, reseruata
 terminatione tantum aliquorum proces-
 suum pro Sanctorum Canonizzazione, ac
 presertim S. Philippi Neri, ad quem propo-
 nendum ipse fuerat à Sacra Rituum Con-
 gregatione deputatus, Indicis Congrega-

tioni adesse voluit; vt grauissimo cuidam
 negotio finem imponeret. At inde digres-
 sus Domum reuertit, atq; illicò cœpit ex
 morbo periculosè decumbere, & feбри de-
 fatigari continua, quæ duplicis Tertianæ,
 vt dicunt, proportionem habens vigesimo
 die ad extremum illum perduxit. At quò
 Roberti debilitaretur corpus, eò magis vi-
 debatur spiritus roborari, & inusitato ac
 maximo gaudio delibutus, quòd vltimam
 sibi instare censeret horam commigrandi
 ad æternam vitam, quam domum ipse suam
 appellabat; vt cum Domino æternum re-
 quiesceret; adeò eius ferebatur desiderio,
 vt terrenarum rerum nauseam habere, se
 satis diù vixisse, & Domum suam frequen-
 tissimè repeteret; Nequè ab isto sermone
 cessare vnquam audiretur, siue febris in-
 cenderet, siue dolor affligeret, siue lassitudo
 dissolueret, siue æstu calorequè febris
 à mente aliquando aberraret, siue illius sa-
 nitate integra vteretur. Rogauit igitur,
 & efflagitauit enixis precibus, ne sibi oc-
 cultaretur periculum decessus ex hac vita,
 qua maximè oneratus molestiam excipie-
 bat; & ideò à Reuerendissimo Mutio Vi-
 tellesco Societatis suæ Præposito Generali,
 quem semper speciali obseruauerat amore,
 fidem dari vltro sibi voluit, ne sibi eius cer-
 titudo differretur. Ab ijs verò, qui hostias

& preces pro se offerrent, illud vnum requirebat, ne vitæ suæ à DEO peterent inducias; Imò summum ipsum Pontificem, qui inuisere illum accesserat, cum audisset DEVM inter aras & sacra pro se precati, rogauit humillimè illo consilio impostero facturum, vt à DEO gratiam obtineret; non vt à mortis periculo liberaretur, sed vt citius ab huius mortalis vitæ vinculis posset dissolui, & ad CHRISTVM ac Patriam proficisci. Cum autem ministrantium circa se studium videret. En quanta, dicebat ille, ob huius vermis & vilis pauperis sanitatem patrantur, deturbantur quanta? Quare graues prohibuit sumptus, ne in se perderentur ea, dum CHRISTI pauperes non panem, nō stratum haberent. Aduersus morbi contumaciam industriam in se non deberi, vtpotè, qui iam nihilo inservire posset. Medicos ideò simul alloquebatur, quòd ad suam progredi domum sine rent, neque impedire quærent, ne homo mortalis iam expleto vitæ suæ tempore moreretur: Minime tamen recuabat ipsorum acquiescere præceptis, cum se omnino diuinę crederet voluntati, & redderet è vestigio paratissimum non modo illorum, sed cuiuscunque etiam ministratium edicta exequi.

At quam altè in se virtutes has defixas haberet, & innatas, illo presertim apparuit

tempore, quo sui morbi initio per aliquot horas ex grauioris febris infestatione delirans, inter sacras colloctiones & humilitatis, ac obedientiae actus se continuo exerceret. Monuerunt interea Medici illum melius se habere, ac communi gratulatione gesticabant, dum solus ipse altissima cordis mœstitia correptus, quærebatur, quod à spe proximè commigrandi ad domum retraheretur. Quare lacrymolis sæpissimè singultibus Cœlestem Patrem exorabat, ut ad se illum iuberet venire. Nescio aiebat ille, me adhuc ulli maium per DEI gratiam dedisse exemplum: At quid in posterum mihi sit futurum ignoro; Plurimos enim scio, & perhorresco ad hanc peruenisse ætatem DEO gratissimos, qui cum diutius vixerint, salutis suæ dubium reliquerunt. Nec premi dolore, & intimis afflictari eiulatibus cessauit, quin prius in die Beatissimæ VIRGINIS Natiuitati dicata intellexerit tempus tam exoptatum appropinquasse. Quo contineri minimè potuit, quin præ festinatione alta claraque voce ter repeteret hec verba. O bonum nuntium. Sacratissimo igitur Viatico prosequenti die indicto; eadem enim manè & altera ex precedentibus venerabili cibo cum veræ pietatis significatione se recreauerat; S. CAROLI Borromei mortis lectio-

nem audire voluit: Et quia iam per decem annos antea Testamentum de humanis sapientissimè condiderat, cœlestibus idè tantum incumbens meditationibus & colloquijs, etiam de spiritualibus testaturus. Medietatem vnā Animæ suæ dulcissimo suo CHRISTO IESV: Alteram verò Sanctissimæ VIRGINI MARIAE legare ipsemet ego audiui. Sequenti verò manè cum Dominum & Creatorem suum venire cognouit, summa cum deuotione & humilitate è lecto surgens, humi stratus, & genibus flexis (vires subministrante charitate) percipere voluit, illiquè ex toto corde agonem suum commédare. Gratiarum autè actione persoluta duo sibi promitti curauit, quæ Testamento suo conscribebantur. Vnum nimirum, quòd sine vilo apparatù sepeliretur, Alterum quòd efferretur in Sepulcro Patrum suæ Societatis. Neq; sex horæ elapsæ erant, quòd Sacramentum vñctionis porrigi instantissimè postulauerit, vt in prælium cum morte descensurus, dum validis vteretur sensibus, ijs etiam armis muniri diutius minimè protraheretur. Reuerendum deinde Patrem Andreā Eudemoioanem eiusdè Societatis, cuius doctas scriptiones Robertus semper summa veneratione suspexerat, rogauit, vt litteris testaretur se per misericordiam DEI in Eccle--

sia Catholica & ea fide decedere, quam semper animo & scriptis suis professus fuerat, ac ne de ea aliter morientem sentire, vel sensisse vnquam, quam operibus docuerat suis.

Hac verò Bellarmini Egritudine per Urbem delata, omnes tam summæ, quam mediæ, & infimæ conditionis Viros permagnus inuasit dolor, & licet initio ex Medicorum præcepto, ne ab adeuntibus defatigaretur, ferè nemo admissus fuerit: paulò tamen post arceri viri primarij minimè potuerunt, quin illum salutaturi, & vltimum Vale precaturi adierint: Accesserunt Illustrissimi Collegæ, & purpurati Patres bini, terni, & quini, ac pleriquè semel, atq; iterùm reuerfi, cum in digressu intercessionibus illius apud cœlestem Patrem se commendati benedictionem implorarent, & ipse abnuens sibi potius illorum deferendam humillimè responderet, manibus eius exosculatis, & oculis ac capiti suo admotis non sine lacrymis discedebant; mittebāt etiam nonnulli pluries singulis diebus sciscitatum de ipso. Nec qui aberant vti presertim Illustrissimi ac Reuerendissimi Franciscus Sfortia, Odoardus Farnesius, & Alexander Vrsinus eiusdem peramātissimi, obseruantix & officij genus præteribant cum familiaribus suis, vel eiusdem Societatis Pa-

tribus quotidie de illo moneri demandarent. Plurimis interea ac deinde singulis etiam inferioris nobilitatis Viris illum saltem intueri expetentibus ingressus non potuit denegari. Nonnullis verò manus etiam exosculari permissum erat, cum ipse clausis plerunque oculis, vel diuinis meditationibus esset intentus, vel aliquandò ex præcedenti febre, ac Vigilia grauatus aliquid caperet quietis. In eius autem familiares, vel Patres Societatis, quoties per Urbem quisquā incideret, anxie querebat de eiusdem salute; Et cum in nobilium, ac infirmorum cœtu frequentissimus de illo esset sermo, plurimi proprium sanguinem libenter effusuri pro tãto Christianæ Reipublicæ incommodo reparando audiebantur. Sed non minor extitit cura de ijs rebus, quibus ille vti cõsueuerat apud se Religionis causa seruandis. Missale enim vno Pontifici delato, Breuiaria, Diurnum, Rosaria, pios libellos, pileos, ac cetera huiusmodi iisdem Cardinales, & primarij Viri desumpserunt. Illis verò quibus nihil extorquendum supererat alios miserunt pileos, Rosaria, & similia, quibus cum ipse per aliquod temporis spatium vsus esset Dominis remitterentur. Sanguis ex sectione venæ die tertia decubitus, & deinde ex arundinibus ad aures admotis missus partim vasis, & par-

tim linteolis exceptus à Medicis, cœterisque, qui aderant diligentissimè fuit asservatus.

Aderat interea familia, aderant consanguinei aliqui, aderant Patres ipsius Societatis, luctu ac lacrymis peracerbè moestissimi, & dulcissimi Patris, ac Patroni ultima precatione benedicturi. Cum ipse intentis in cœlum oculis eleuato brachio omnes benedicens addidit. Pacem do vobis, Pacem relinquo vobis, Pacem commendo vobis. Quia verò deinde illud vnum Robertum vrgeri cœperat, ne libellam nimirum Patribus suæ Sodalitatis ex Testamento hæredibus institutis ita relinqueret tenuem, vt persoluendis exequijs, & se componendos satis non esset, ijsque obesse posset, quibus statuerat subuenire (decreuerat enim Robertus impofterum à publicis functionibus vacuus redditus omnes suos pro eiusdem domus professæ censibus soluendis elargiri) Iterum se sine vlla pompa sepeliri iussit, & quasi diuinaret, quid futurum semel præcepisse minimè contentus pluries iterauit. Petijt etiam à Summo Pontifice solutionem Cardinalitij anuli suis hæredibus condonari, & audita impetratione cum se à molestiæ periculo videret securum, mirificè lætatus, Pontificiæ liberalitati plurimas reddidit gratias. Sci-

pioni verò Cardinali Cobellutio, cui placuerat Sanctissimo rem hanc proposito sermone indicare, pro beneuolentia in se semper comprobata se fassus fuit addictissimum. Sicuti enim mortis minimè terrebatur periculo, ità placidissimè alloquebatur omnes, & suæ humilitatis & grati animi persoluebat officia. Ideo Odoardi Cardinalis Farnesij audita quadam Epistola innumera illius, nec non totius Serenissimæ Farnesie familiæ per longam seriem annorum in suam sodalitatem, in maiores suos, & in se ipsum beneficia commemorans; querebatur, ne pares deuotionis reddere posset significationes. Et in Collegij Germanici Protectoribus Franciscum Cardinalem Boncompagnium connumeratum à Sanctissimo sentiens, mirifica perfundi voluptate pronunciauit, regimini illi præpositum audisse Gregorij Tertij Decimi Collegij illius fundatoris non minus pietatis quam Sanguinis dignissimum successorem. Dissoluebantur interea pijsima illa vincula carnis, & spiritus, dum ipse in cubiculo cordis sui, & intra se tacitus cœlestia lætabatur mira cum pace meditari, & beatos affari spiritus, ac fœlicissimas audire voces videbatur, cum ministrantes obseruarunt, quòd aliquando plenus animi, & ardore quodam Spiritus gestiebat ferri in Cœlum,

& DEVM obsecrabat, vt carnem (aiebat ipse) putidam & verminosam diuelleret; quæ sibi ad ipsum commigrandi erat impedimento: imò ipsammet etiam proprii brachij carnem altera manu desumens sic loquebatur; Quid non disrumperis caro proditrix? Quid agis? Quid differs? Ad DEVM verò reuersus dicebat, Non mea, sed tua voluntas fiat. Aliquando vero in imum se humilitatis abijciens videbatur pertimescere Diuinum Iudicium, & ijs, qui in Superna Patria DEVM pro se precari exorabant, respondebat. Nimis magna est res ista, non tam facilis est Via, quæ ducit ad Vitam: Magnum DEI beneficium in me futurum existimabo, Purgatorium etiam permultos annos obtinere. Addebat tamen, quòd si salutis sedem fuisset adeptus, pro omnibus, ac pro Patronis, ac benefactoribus suis presertim minimè se exorando defuturum. Suscepit postremam, & saluberrimam Pontificis benedictionem, ac vt maiori perciperet veneratione & fructu, confessionis illam, alijsquè orationum pijs precibus voluit anteuertere. Tandem Creatori suo spiritum redditurus, Sacratissimam CHRISTI è Cruce pendentis effigiem per iteratos amplexus pluries exosculatus, labantibus brachijs capiti suo imposuit in supremæ deuotionis signum;

deinde verò ad pectus illa dulciter stricta, brachijs in ipsiusmet Crucis figuram cancellaris, Apostolico Symbolo, Psalmo Quinquagesimo, Oratione Dominicali, & Salutatione Angelica clarè distinctèquè pronuntiatis, semimortuis postremo vocibus IESVM trigeties inuocauit. Et iam destitutus voce clauferat oculos & membra coeperat explicare cum in vltima conflictatione specie vultus hilariori in Redemptorem suum iterum defixis oculis, & ore ad loquendum composito placidissimè tradidit Animam hora secunda post Solis Ortum feria sexta quintodecimo Kal. Octobris Anno post CHRISTVM natum MDCXXI.

Hinc dulcissimo orbatu parente interluctus & lacrymas, quas teneberrimus percipiebat animi nostri sensus, postrema manuum ac pedum oscula exhibuimus. Mox verò eius corpore pro multitudinis sequentis strepitu vitando in domum professorum eius Societatis clam delato, statim ac eius mors in vulgus promanauit, ille hominum, & Prelatorum concursus visendi, & manus ac pedes eius exosculandi causa est factus, vt ante primam Noctis horam aditus denegari minimè potuerit. Consequenti post die, iustà sine Cardinalitij funeris apparatu fieri sicut ipse Pontificem suo testamento obsecrauerat nō est permissum.

Adfuit enim purpuratorum Senatorum Corona adhibita Heluetiorum custodia, ut populi arceret frequentiam, quæ talis fuit, ut Seniores ipsi non meminissent in illo Templo unquam se vidisse maiorem. Ea quidem nec submoueri potuit, quin deuotionis studio aliquid Vestium auferre tentans Cardinalitium Galenum abstulerit, & floecos ex eo pendentes decerpserit. Rosaria interim eius corpori religiosè tangendo sunt continuo admota. Iustis autem persolutis, ijs, qui in Ecclesia enixè morabantur, ut manus ac pedes exoscularètur usque ad tertiam noctis horam corpus eius expositum est. Deinde cum à Bernardino Castellano Pontificis Physico, & Medicæ artis Viro prestanti de more procuratum, & aromatibus iam primum fuisset conditum, compositum est
in capsâ lignea,
& in Communi Patrum
eiusdem Societatis loculo
ut ipsemet concupierat.



Eius verò Testamenti
hoc est exemplar.



N NOMINE DO-
MINI NOSTRI
IESV CHRISTI.

*Ego Robertus Bellar-
minus tituli S. Ma-
riae in Via Praesbi-
ter Cardinalis è Societate IESV, as-
sumptus petij à Sancta Memoria Cle-
mente Octavo facultatem condendi
testamentum ad pias causas tantum,
ut certus essem ea, quae mihi deceden-
ti bona temporalia superessent, quaeque
dum viuerem dispensari pauperibus
vel Ecclesijs non poterant, utpotè mea*

*sustentationi necessaria, ad Pauperes
 & Ecclesias redirent. Concessit Pon-
 tifex indultum testandi generalius,
 quam voluissem, sed non acceptavi,
 nisi ad pias causas, ut petieram.*
*Habetur hoc indultum inter alias bul-
 las mihi concessas in magno folio per-
 gameno cum plumbo datum Anno Do-
 mini MDCIII. VI. Idus Aprilis
 Pontificatus Sanctissimi Papæ Cle-
 mentis Octavi anno duodecimo. Ergo
 hoc indulto præsupposito testamentum
 condidi Capuæ cum essem Archiepis-
 copus eius Ciuitatis, deinde eo abro-
 gato, aliud condidi Romæ: Sed propter
 circumstantias mutatas hoc secundo
 etiam abrogato, nunc iterum testamen-
 tum condere statui, cum sim annorum
 sexaginta nouem, & proximus ulti-
 mæ diei, ut opinor, sed mente, & cor-
 pore per DEI gratiam beneualens.*

Primum igitur Spiritum meum in manus DEI commendatum toto corde exopto, cui ab adolescentia servire desideravi, & precor ut me inter Sanctos electos suos non aestimator meriti, sed venia largitor admittat. Corpus meum non apertum nocturno tempore, sine ulla pompa ad Ecclesiam Societatis IESU, vel Collegij Romani vel domus professie deferri volo, & exequia fiant per solos Patres, & fratres Societatis sine interuentu Sacri Collegij sine lecto sublimi, sine insignijs, vel flauellis, eademquè simplicitate, qua cæteris de Societate fieri solent, & hac de re quam maximè possum Sanctissimum Dominum Nostrum humiliter rogo, ut desiderio meo satisfaciat.

Quod attinet ad locum Sepulturae libenter iacere corpus meum voluissem

ad pedes B. Aloisij Gonzaga mei quō-
dam spiritualis filij : Sed tamen Su-
periores Societatis ubi voluerunt cor-
pus meum ponant. De rebus tempo-
ralibus mihi à Sede Apostolica con-
cessis , vel undequaque acquisitis ita
dispono . Hæredem Vniuersalem no-
mino , & instituo domum professam
Romanam Societatis I E S V , in qua
Religione nomen dedi . Volo autem,
ut primò soluantur debita, si qua fue-
rint, & iura ijs quibus debetur : Dein-
de dentur familia ad quadraginta dies
more solito, quæ ad victum pertinent,
idest, quod illis taxatum est in pecu-
nia, pane, vino, & companatico. Ne-
què aliud eis relinquere possum cum
ad solas pias Causas Testamentum fa-
ciendi facultatem petierim, & eadem
causa singulis stipendium, siue provi-
sionē aliquam dederim præter victum.

Fratri

Fratri meo secundum carnem, vel eius
 heredibus restituatur Imago, seu Qua-
 drum Clemētis Octauī Pontificis Ma-
 ximi. Nepoti meo Angelo detur Ima-
 go, seu Quadrū Roberti Cardinalis
 de Nobilibus, & unū ex duobus Qua-
 dris S. CAROLI Borromei, & una
 ex paruis Crucibus, quas ad pectus ego
 gero cum reliquijs inclusis. Collegio
 Romano restituantur annalium Car-
 dinalis Baronij tomi sex, quos mihi
 accomodauit, ut eidem dentur alij sex
 mei; nam cum hac conditione accepi
 à Collegio sex primos Tomos, qui meo
 nomine dati fuerunt Collegio eidem
 ab eodem Auctore, ut post obitum re-
 linerem integrum opus. Eidem Col-
 legio relinquo unam ex tribus plane-
 tis pretiosis cum stola, & manipulo
 quam voluerit, & omnia scripta mea,
 & totam Bibliothecam, nisi Reueren-

diffimo Patri Generali videatur, Bi-
 bliothecam alicui alteri loco Societatis
 magis egenti applicare. Sancta Ma-
 ria in Via, qui Titulus meus est re-
 linquo unam ex tribus planctis pre-
 tiosis, quam heres meus dare voluerit.
 Aliud titulo meo non relinquo, quo-
 niam satis multum expendi in fabrica
 Ecclesie, ut fratres illi sciunt, qui
 hoc ipsum petierunt loco paramento-
 rum, quae illis emere constitueram.
 Reliqua omnia bona, quae quocunque
 modo ad me pertinent, seu pertinebunt,
 siue immobilia, siue mobilia, siue se-
 monentia, siue iura, siue credita, siue
 sacra ad Cappellam, siue profana ad
 uestiarium, vel cellas varias pertinen-
 tia, siue pecunias numeratas, siue quae-
 cunque alia integra ad heredem, id est
 ad domum professam Romanam Socie-
 tatis IESU, ut dictum est, pertineant.

volo, & in illis omnibus, & singulis
 ipsam heredem instituo, & nomino.
 Pro auxilio Anima mea nihil relin-
 quo, tum quia parum admodum erit,
 quod ad heredem meum perueniet, cum
 ego cumulandis pecunijs, vel rebus pre-
 tiosis acquirēdis nunquam operam de-
 derim. Tum quia confido imò certo
 scio non defuturam huic offitio piam
 charitatem matris meae Religionem vi-
 delicet Societatis IESU, ut pro alijs
 filijs suis nūquam deest, & quemadmo-
 dum ego non defui toto vitæ meae tem-
 pore pro defunctis Societatis sacrificia
 & orationes DEO offerre. Exe-
 cutorem huius meae voluntatis nomi-
 no honoris causa Illustrissimum & Re-
 verendissimum Dominum meum Car-
 dinalem Aldobrandinum. Labor
 enim, ut existimo nullus erit in exe-
 cutione testamenti huius. Relinquo

autem Illustrissimo Domino meo id,
quod pretiosius nihil habeo, videli-
cet Crucem ligneam reliquijs pretio-
sissimis refertam, quarum Catalogus
in scriniolo cooperto rubro holoserico
inacnietur.

Hoc testamentum valere volo pri-
oribus abrogatis, in omnibus. Et per
omnia reuoco, cassa, Et annullo, etiam
si hoc forte non fuerit cum debitis so-
lemnitatibus factum, id enim aperte
concedit Bulla Summi Pontificis Cle-
mentis Octavi, in qua mihi data est
facultas testandi etiam per simplicem
Epistolam, vel cedulam manu mea
subscriptam.

Ego Robertus Cardinalis Bellarmi-
nus, ut supra dispono, instituo, lego,
Et testor, non solum prefato, sed omni
meliori modo die XXIII. Januarij.
MD. C. X. I.

Quia vero Robertus anno su-
periore de more Cardina-
lium & optionis iure, ad titulum Ec-
clesiæ S. Praxedis transierat & Il-
lustrissimus & Reuerendissimus D.
Cardinalis Petrus Aldobrandinus
nominatus testamentarius executor
obierat, legatum idè relictum Ec-
clesiæ S. Mariæ in Via soluendum
esse Ecclesiæ S. Praxedis declara-
tum Robertus reliquit, & Illustris-
simum ac Reuerendiss. D. Cardina-
lem Hippolytum Aldobrandinum
præmortui Nepotem eiusdem testa-
menti Rogauit executores.

Sic igitur illum amantiſſimum in
terris ammiſimus Patrem, quem
nunc recensemus, lucratos esse Pa-
tronum in Coelis, & quem Chri-
stianæ Reipublicæ vidimus adhuc
inexpugnabilem defensorem, im-

posterum speramus intercessorem
 pijsimum, & quidem sicuti plurimi
 non desunt, qui illius sepulcrum
 pijs precibus frequenter adeant,
 nec non illum implorent. Ità etiam
 nec pauci adhuc numerantur, à qui-
 bus eius intercessionem & auxilium
 minime fuisse desideratum ipsi nec
 profitentur; quos referendos
 illis, qui eiusdem vitam, &
 & acta accuratissime
 conscribunt,
 relinquam.



INDEX.

R OBERTI ortus & Educatio	pagina	12
Eius vocatio ad religionē & ingressus.	p.	14
In studiorum & vitæ disciplina profectus.	p.	16
Sacris initiatur.	p.	18
Romæ controuersias suas explicat.	p.	19
Parisijs cum legato petit.	p.	20
Ab Innocentio Nono designatur Cardinalis.		20
Religionis fungitur præfeturis.		22
Creatur Cardinalis sub præcepto obedientiæ.		22
Sibi & aulicis suis domesticam instituit disciplinam.		25
Capuano Archiepiscopatu præficitur.		27
De ijs quæ in illa Ecclesia gessit.		29
Romam ad Pontificia comitia reuertitur.		38
A Pontifice Romæ detentus remittit Archiepiscopatum.		39
Scripta & acta ad coadiuuandos proximos & aliquorum conuersio.		41
Contemptus Diuitiarum.		45
Auersio à Consanguineis & Patria.	46.	49
Humanarum Laudum fuga.		51
Roberti Prudentia.		55
Roberti Iustitia.		60
Roberti Fortitudo.		64
Roberti Temperantia.		68
Fides Roberti.		69
Spes Roberti.		69

104	
Charitas Roberti.	71
Plurimorum de Roberto existimatio & Iu- dicium.	74
Roberti recessus ad Domum probationis sue Societatis.	81
Roberti Egritudo, & mors.	82
Testamentum Roberti.	93

FINIS.







